



► **Une voix.**- Also schiedlech fir d'Land... Dat ass awer...

► **M. Claude Wiseler** (CSV).- ...fir déi Äntwerte respektiv fir déi Argumenter och eriwwerzebréngen.

Mir fannen déi do Fro onnéideg. Si ass och ouni Débat virdu gewiescht. Et ass just eng Fro, fir eng Fro ze stellen. A mer fannen, datt hei e populisteschen Débat déclenchéiert gëtt.

► **M. Gast Gibéryen** (ADR).- Voilà!

(Interruptions)

► **M. Claude Wiseler** (CSV).- Wat d'Ausländerwahlrecht ugeet, ass et sécherlech,...

► **Une voix.**- Ooh!

► **M. Claude Wiseler** (CSV).- ...an ech hunn et virdu gesot, sécherlech eng referendaresch Fro. De Corps électoral gëtt geännert, an dat ass wichtig.

D'Fro, ob een awer déi do Fro an dësem Moment soll stellen, ob d'Opportunitéit vun dëser Fro, mat all deem, wat u schwierigen Diskussiounen op eis zoukënnt, elo ass, hu mer oft genuch gesot. Ech wëll dat net nach eng Kéier widerhuelen.

Richteg ass awer, datt 45% vun Netlëtzebuerger hei am Land e Besoin vun zousätzlecher Participatioun noutwendeg maachen. An déi Zilsetzung, soen ech ganz kloer, deele mir och als Partei. Dofir hu mer proposéiert, eng Solutioun fir déi hei Fro iwwert d'Nationalitéitgesetz ze fannen.

Mir deet et nach ëmmer leed, datt mer dofir net konnte gemeinsam eng gréisser Diskussioun mateneen organiséieren. Well et wär besser gewiescht, déi Diskussioun ze féieren op eng calme Aart a Weis, wéi elo se an e Referendum ze ginn, wou se duerchaus emol kann ausrutschen, wat dësem Land géif richteg schueden. An Dir hutt et selwer ënnerstrach.

Wann een dat awer elo mécht, da muss ech mech just froen, Dir schlot hei eng Solutioun vir, wou Der sot, et muss een zéng Joer am Land sinn an et muss een eng Kéier scho mat wile gaange sinn. Da stellen ech mer d'Fro: Firwat déi do Konditiounen? Wou kommt Der un déi do Konditiounen? Wat bezwecken déi Konditiounen? Wat bréngen se?

Mir sinn nämlech der Meenung, datt, wann Der wierklech d'Participatioun vun den Netlëtzebuerger wëllt an Dir stellt esou restriktiv Konditiounen wéi déi do, da kritt Der net déi Äntwert - wann dat hei géif duerchgoen -, net déi Äntwert op déi Fro, déi Der gären hätt. Dir kritt net déi Participatioun an déi Zuele vu Participatioun, déi Der braucht.

Déi Proposition, déi mir gemaach hunn iwwert d'Nationalitéitgesetz, wäert eis wesentlech méi Effikasitéit bréngen, wesentlech méi Leit, déi d'Lëtzebuerger Nationalitéit kréien an déi duerno kënne mat wile goen, aktiv a passiv mat wile goen, wéi déi Proposition, déi Dir maacht.

Ech mengen, datt d'Participatioun wesentlech méi duerch deem Text wäert ënnerstëtzt ginn, wéi duerch déi Proposition, déi Der do maacht. An ech froe mech och: Firwat just déi hei Proposition? Et wären 100 aner Solutiounen méiglech gewiescht. A se ass och néierens justifiéiert, weder déi zéng Joer nach de Fait, datt een eng Kéier soll derbäi gewiescht sinn. Néierens justifiéiert!

Ech froe mech d'ailleurs, firwat net déi do Froestellung anescht ugaange ginn ass. Firwat kann een hei just mat jo an Neen äntwerten? Firwat huet een net d'Fro gestallt vun der Participatioun, ob een déi wëllt iwwert d'Nationalitéitgesetz, iwwer zéng Joer an eng Kéier schonn derbäi oder iwwer fënnf Joer hei am Land? Et hätt ee jo och kënne esou e Referendum organiséieren.

Et wär d'ailleurs net fir d'Éischt gewiescht, datt e Referendum mat enger Rei Alternativen organiséiert gi wär. De Referendum vun 1919 iwwert d'Dynastie war genau e Referendum mat véier Alternativen: éischters, de Maintien vun der Grande-Duchesse Charlotte (veuillez lire: Marie-Adelheid), zweet Alternativ war de Maintien vun der Dynastie, mä mat enger anerer Grande-Duchesse. Déi drëtt Äntwert, dat war d'Opsetze vun enger anerer Dynastie. An déi véiert Äntwert war d'Republik. Et konnt ee bei véier Alternativen tëschent där enger an där anerer wilen.

Hätt ee wëlle wierklech d'Fro stellen, wéi d'Leit d'Participatioun brauchen, hätt ee jo duerchaus kënne all d'Alternativen, déi eng an déi aner ugin an d'Leit richteg wile loosse tëschent verschidde Systemer, déi méiglech sinn, mat därselwechter Zilsetzung, déi mer jo deelen.

Mä firwat just déi hei? Firwat d'Reduktioun vum Choix? Eng Äntwert, déi an eisen Aen net vill, wann net näischt bréngt! A mir mengen, datt et just gewiescht ass aus Angscht, well en hätt kënne, dee Referendum, eventuell schifgoen. Hei ass eng Chance, datt e vläicht mat jo ausget.

Mä ech fannen et net uerdentlech, net korrekt, net seriö, wéi dat do gemaach gëtt. Et geet just drëm, den Nationalitéiteprinzip hei aus dem Text erauszehuelen. En éischte kleng Schrëtt ze maachen, deen näischt zur Participatioun bäidréit. A wann een de Prinzip eng Kéier dobaussen huet, da kann ee jo déi nächst Etappen an deenen nächste Jore maachen. An dat ass fir eis problematesch als Usaz.

13. Dépôt d'une proposition de loi par M. Claude Wiseler

Ech wëll och, fir ze ënnersträichen déi Wichtigkeet vun deem hei Sujet - a well mer eng Proposition gemaach hunn -, och hei ganz offiziell dem Parlamentspräsident eng Proposition de loi iwwerreechen. Här President, wann ech gelift.

► **M. Mars Di Bartolomeo**, *Président.*- Merci.

► **M. Claude Wiseler** (CSV).- Iwwert déi Proposition, déi mer gemaach hunn, iwwert déi Proposition, déi a sech d'Nationalitéitgesetz ëmännert, fir d'Residenzklausel vu siwen op fënnf Joer erofzeschrauwen, fir e groussen Deel Droit du sol anzeféieren, nom franséische System. Dat heescht auslännesch Leit, auslännesch Kanner, déi hei op d'Welt komm sinn, gi mat 18 Joer automatesch Lëtzebuerger, ouni iwwerhaupt eng Demande méi mussen ze maachen. Se sinn et einfach mat 18 Joer.

Iwwert de Fait, datt s de keng Condition de résidence méi braucht ze hunn, wann s de mat engem Lëtzebuerger bestuet gëss, iwwer eng Facilitatioun vun eiser Kontroll am Sproochesystem an iwwert d'Dispens vun iwwerhaupt enger Sproochekontroll, wann s de 20 Joer hei am Land bass.

Ech wëll awer och soen, well ech wëll korrekt sinn, datt deem Text, dee mer elo agereecht hunn, zu engem groussen Deel den Text vum Projet de loi 6561 vum François Biltgen ass, dee mer nach eng Kéier agereecht hunn, mat deenen Ännerungen awer dran, déi ech elo gesot hunn, wou mer e gutt Stéck nach méi wäit ginn, wéi den Text vum François Biltgen sengerzäit gaangen ass.

6781 - *Proposition de loi portant modification de la loi modifiée du 23 octobre 2008 sur la nationalité luxembourgeoise et portant abrogation de la loi du 7 juin 1989 relative à la transposition des noms et prénoms des personnes qui acquièrent ou recouvrent la nationalité luxembourgeoise.*

► **M. Alex Bodry** (LSAP).- Deen Der virun zwee Joer net wollt. Ech war bei de Verhandlungen derbäi.

► **M. Claude Wiseler** (CSV).- Ech soen lech ganz kloer, datt d'Evolution vun den Diskussiounen natierlech ass, an Dir gesitt och d'Evolution vun där doter Fro an deene leschten 20 Joer, datt Schrëtt fir Schrëtt gemaach ginn ass. Dir wäert eis jo elo net reprochéieren, Här Bodry, deen Text hei ze déposéieren.

► **M. Alex Bodry** (LSAP).- Neen, d'Welt dréit sech net ronderëm d'CSV.

(Interruptions)

► **M. Claude Wiseler** (CSV).- Ech ginn lech domadder 100%eg recht, Här Bodry, d'Welt dréit sech net ronderëm d'CSV, wéi och net ronderëm aner Parteien.

Ech wëll awer e leschte Passage...

► **Une voix.**- ...wat een am Parlament seet...

► **M. Claude Wiseler** (CSV).- Mä se si jo och richteg. Ech wëll vläicht just nach...

► **M. Alex Bodry** (LSAP).- Wat ass elo déi richteg Iwwerzeegung vun der CSV, ech weess et net.

► **M. Mars Di Bartolomeo**, *Président.*- Wann ech gelift! Här Wiseler, fuert Dir virun!

14. 6738 - Proposition de loi portant organisation d'un référendum national sur différentes questions en relation avec l'élaboration d'une nouvelle Constitution (suite)

Discussion générale (suite)

► **M. Claude Wiseler** (CSV).- Ech fuere ganz gär weider, Här President. Ech wëll nämlech nach eng lescht Fro hei opwerfen, e puer Wuert soen iwwert déi Fro, déi net méi am Referendum ass: d'Relatioun tëschent Kierch a Stat, wat fir eis och e wichtige Sujet ass. An

d'CSV war och der Meenung, datt een op dësem Sujet misst bougéieren. Dir kënnt eise Wahlprogramm liesen, Dir hutt en d'ailleurs gelies.

Et ass e Sujet, dee komplex ass. Mir hunn ëmmer gesot, en ass vill ze vill komplex, fir eng einfach Fro am Referendum doriwwer ze stellen. Et stelle sech d'Froen iwwert d'Gehälter. D'ailleurs hutt Der se an där Konventioun, déi Der gemaach hutt, och wesentlech méi vast ugeschwat wéi an der Referendumsfro, déi gestallt gi war. Froen ëm d'Gehälter, ëm de Reliounsunterrecht, ëm d'Kierchefabrécken, Froen awer och iwwert de Contrôle, deen de Stat iwwert d'Kierche soll oder net soll exercéieren. Eng komplex Fro an e wichtige Sujet!

Mä an där Fro, déi Der am Referendum gestallt hat, hutt Der awer just ee Sujet ugeschwat, an dat war dee vun de Ministres des cultes. Sot mir just, firwat Der, wann Der esou eng wichtig Fro wëllt ugoen, déi esou komplex ass wéi déi do, se just wëllt ugoen an engem Referendum an dann d'Fro iwwert déi sougenannte Paschtéieschgehälter frot, oder d'Gehälter vun de Ministres des cultes. Firwat just déi Fro? Firwat net déi aner Froen? Firwat net eng Fro stellen dee Moment scho vun Ufank un iwwert...

► **M. Alex Bodry** (LSAP).- Well et eng Fro ass, déi haut an der Verfassung geregelt ass.

► **M. Claude Wiseler** (CSV).- Jo, aner Froe mussen och an der Verfassung geregelt ginn.

► **M. Alex Bodry** (LSAP).- Do ass et awer net anescht...

► **M. Claude Wiseler** (CSV).- De Contrôle, deen de Stat huet iwwert déi eenzel Reliounsgemeinschaften, ass och eng Verfassungsfro. Mir hunn d'ailleurs en Artikel 22 dofir ëmgeännert, fir déi Fro do an de Grëff ze kréien oder anescht ze formuléieren. Firwat hutt Der déi Fro dann net gestallt sengerzäit? Datt mer se elo eraushuelen, well se zu engem Deel beäntwert ass, fannen ech normal. Mä firwat just d'Fro stellen iwwert d'Paschtéieschgehälter?

An ech soen lech, well dat nu wierklech d'Aart a Weis war, fir de Problem uzegoen, well ee wëllt de Referendum einfach op seng Säit entschiet kréien, ouni déi richteg Froen ze stellen! D'Fro iwwert d'Paschtéieschgehälter an d'Gehälter vun de Ministres des cultes ass dach net déi richteg Fro, déi Der hei an där ganzer...

D'Fro iwwert d'Responsabilitéit vum Stat par rapport zu de Reliounen: Wéi wäit ass de Stat responsabel, fir ze wëssen, wat do geschitt? Dat ass déi richteg Fro! Hätte mer déi gestallt, hätte mer eng ganz aner Diskussioun kritt. Eng ganz aner Diskussioun, eng richteg Diskussioun, eng wichtig Diskussioun kritt. Dat wollt mer awer net als Diskussioun. Do hätt ee kënne de Referendum net gewonnen, an dat wär jo net richteg gewiescht.

Mir hunn dat populistesch als Approche fonnt, well mer fonnt hunn, datt déi richteg Problemer net hei ugeschwat ginn an datt déi Froen nëmme gestallt gi sinn, an et ass lech och gelongen, fir Drock auszeüben. Déi Konventioun ass op Basis vun deem Drock ënnerschriwwen ginn, an d'Fro konnt du vum Dësch geholl ginn. Mä d'Intentionen nëmme, fir Drock auszeüben, fannen ech a sech net korrekt.

Ech kommen zur Konkusioun. Dës Referendumsfro si just, esou wéi se elo hei gestallt sinn a formuliert ginn, aus parteipolitesche Grënn gestallt an enger Froestellung, déi an eisen Aen net objektiv ass. Déi virgeschloen Alternative loosse sech an eisen Aen net seriö justifiéieren. A mir fannen, datt et hei e Mëssbrauch vun Instrument vum Referendum ass fir parteipolitesche Zwecker an datt et laanscht d'Leit geet. Dat Instrument vum Referendum ass eis extrem wichtig, mä esou ugewannt fanne mer et net seriö an et ass kee Courage, fir déi Froen ze stellen, déi a sech d'Leit interesséieren.

Ech soen awer och hannendrun, elo kréie mer eng Diskussioun, elo kréie mer eng Campagne an deenen nächste véier Méint. Ech ginn dovunner aus, datt dat Gesetz haut gestëmmt gëtt, egal wat ech soen, datt dat Gesetz haut gestëmmt gëtt, an da kréie mer déi Campagne. An ech soen och ganz kloer fir meng Partei, datt mer déi och probéieren, mat Argumenter ze maachen. Hei si mer jo an der Chamber.

Dobauss gi mer bei d'Leit an eis Versammlungen a mir wëllen och op déi Froen äntwerten. Mir wëllen och mat eisen Argumenter erklären, firwat mer esou an net anescht äntwerten, an dat seriö ugoen. Dat soen ech och kloer an d'äitlech hei. Ech soen och, dat ass jo just e konsultative Referendum.

Ech soen awer och hannendrun, datt natierlech d'Resultater vun deem Referendum, wéi se och ëmmer sinn, an eisen zukünftigen Iwwerleeungen nom Referendum, datt mer an eisen Iwwerleeungen deene Resultater wäerte Rechnung droen. Mä et muss een natierlech kucken, wat

sech do ausdréckt, wéi et sech ausdréckt, wéi d'Diskussioun an der Campagne leeft, an haapt-sächlech och, wéi d'Proportiounen vun de Resultater sinn. Op jidde Fall gëtt dëse Referendum e wichtegt Element an eisen zukünftigen Iwwerleeungen nom Referendum.

An ech soen nach hannendrun, datt och dës Majoritéit eng grouss Responsabilitéit hëlt, wa se dat do mécht. Haapt-sächlech duerno, wann deen nächste Referendum nom Artikel 114 vun der Constitution kënnt.

Mir waren ëmmer der Meenung, datt ee Constitutionsännerung sollt mat engem grouse gesellschaftleche Konsens maachen. Kommen elo hei Resultater, étriquiert Resultater eraus, déi Der duerno wëllt an d'Constitution mat iwwerhuelen, d'Constitution, déi Der dann erëm wëllt an e Referendum stellen, an där kommen zwee oder dräi mat all deenen Onzeffriddenheiten, déi schonn duerch aner Diskussiounen, zum Beispill déi Reliounsdiskussioun zesumme kommen, da stellt Der déi zéng Joer Aarbecht, déi awer gemaach gi sinn, an déi Nécessitéit an déi Wichtigkeet, déi eng nei Constitution vu Lëtzebuerg hätt, awer uerg a Gefor! Eng grouss Responsabilitéit, déi Der domat hutt. Ech wëll et just eng Kéier an aller Däitlechkeet hei gesot hunn.

An ass all deene Grënn wäert d'CSV zu dësem Text net kënne mat jo äntwerten, mä mat Neen äntwerten.

Domat wär ech normalerweis fäerdeg. Ech wëll just nach eppes hannendruetzen, eng technesch Fro, den Här Bodry huet se och schonn ugeschwat, well se gëscht opkomm ass an där Diskussioun, wéi dann elo ausgezielt gëtt an deem Referendum hei. An dem Här Bodry seng Explikatiounen sinn och richteg.

Et ass just ee Punkt, also et ass elo e wéineg méi spontan hei, et ass just ee Punkt, deen ech net richteg verstinn, an dat ass deen, et ass jo méiglech, vu datt dräi Froen op engem Bulletin sinn, datt verschidde Leit op eng Fro äntworten an op zwou Froen net. Dat ass méiglech. An da gëtt dee Bulletin fir déi eng Fro valabel erkläert, deeselwechte Bulletin fir déi aner Froen awer net valabel erkläert. Dat fannen ech awer juristesche e richtige Problem.

Dann hätt een et a priori besser mat dräi separate Bulletine gemaach. Sou wéi et elo gemaach gëtt, ass och a kengem Gesetz fixéiert en fin de compte, datt mer de Bulletin eng Kéier als valabel an eng Kéier als net valabel erklären. Ech hu mech awer gefrot, ob dat net wierklech e reelle juristesche Problem ass, wa mer do zu de Resultater kommen.

Dat gesot, soen ech lech Merci fir d'No-lauschteren.

► **Plusieurs voix.**- Très bien!

► **M. Mars Di Bartolomeo**, *Président.*- Merci och dem Här Wiseler. Nächsten ageschriwwene Riedner ass den Här Eugène Berger.

► **M. Eugène Berger** (DP).- Merci, Här President. Léif Kolleeginnen a Kolleegen, Politik méi no um Bierger, d'Politik méi no mam Bierger ze gestalten, dat ass en Zil, datt sech d'Majoritéitsparteien op de Fändel geschriwwen hunn. An de Referendum vum 7. Juni ass e wichtige Schrëtt, fir dëst Zil ze erreechen.

Jo, de Referendum dëst Joer ass en historesche Moment, well mer nei Weeër gi bei der demokratescher Abannung vum Vollek bei wichtige Gesellschaftsfroen. Esou eng partizipativ Démarche vun der Chamber, am Endeffekt, ass et an deem Mooss an deene leschte Jorzéngten nach net ginn, well mir banne mat dem Referendum d'Biergerinnen an d'Bierger direkt an d'Aarbechte vun eise wichtegste Gesetz, nämlech d'Aarbechte vun der Verfassung banne mer se domadder an.

Ech wëll nach eng Kéier och kuerz de Kontext vun den Aarbechten um Referendum hei skizzéieren. De Rapporteur huet dat scho gemaach. Mä et ass awer wichtig, fir nach eng Kéier de Kontext ze setzen. D'Chamber beschäftegt sech schonn zéng Joer oder méi, op alle Fall e Jorzéngt mat enger Neifaassung, mat enger Moderniséierung vun deem wichtigsten Text an eise Rechtssystem. An d'Koalitioun huet och an hiren Accord geschriwwen, datt se wëllt déi Verfassungsreform elo och an dëser Legislatur ofschléissen, datt mer endlech d'Aarbechte kënne fäerdeg maachen.

Ech wëll nach eng Kéier rappeléieren - ech mengen, hei ass dat vläicht an dësem Haus iwwerflësseg, mä ech maachen et awer nach eng Kéier -, ech wëll rappeléieren, datt d'Verfassung dat wichtigst, dat iewescht Gesetz ass. Et regelt d'Organisatioun vum Stat, et garantéiert eis Grondrechter an et setzt och de legale Kader, deen dann all Gesetz an all Reglement och muss respektéieren.

An, Här President, mir wëssen et allegueren, et ass e Fait, scho bal eng Banalitéit, fir et ze soen, mä eis Gesellschaft, eng Natioun, e Stat, deen evoluéiert, verännert sech. An duerfir huet dës



Reform vun der Verfassung jo als Zil, fir d'Verfassung un d'Gesellschaft, un eis Gesellschaft hei zu Lëtzebuerg, och besonnesch vum 21. Jorhonnert unzepassen an och eng Rei Inkohärenzen, déi am Laf vun de Joren, well jo awer emol déi eng oder aner kleng Textverännerunge gemaach gi sinn, wou dann och net nëmmen de Risiko vun, mä heiansdo Inkohärenzen entstane sinn, aus der Welt ze schafen.

Wéi gesot, déi Aarbechten, déi si scho laang amgaang hei an der Chamber. Vill Artikel sinn an der Kommissioun an deene leschte Joren iwwerschaaft ginn am grouse Konsens, Zoustëmmung. Aner Artikel mussen nach ofgekläert ginn. An et ginn och verschidde Froen, déi an eisen Ae besonnesch wichteg sinn. Firwat datt déi Froen hei besonnesch wichteg sinn, déi dräi, dat ass, well se ronderëm d'Participatioun dréien, also ëm d'Basisrechter an enger Demokratie. An do, bei deene wëlle mir also d'Bierger froen, fir eis beim Schreiw vum der definitiver Verfassungsreform ze guidéieren.

Mäi Virriedner, deen huet jo ënner anerem Beispiller aus anere Länner geholl a gesot, firwat datt déi déi eng oder déi aner Fro geholl hunn. An en huet gemengt, et wier keng Logik, oder et wier eng aner Ursach derbäi, fir déi Froen esou ausgewielt ze hunn.

Neen, et ass ganz kloer: Et si Froen, déi, éischens, direkt mat der Verfassung ze dinn hunn. Et si prezis Artikel vum der Verfassung, déi concernéiert sinn. A virun allem sinn et awer och Froen, déi ganz vill mat der partizipativer Demokratie an eisem Stat ze dinn hunn, wéi d'Matbestëmmung vun den auslännesche Matbierger, wéi zum Beispill d'Matbestëmmung vun deene jonke Matbierger hei am Land. Et ass also do awer ganz kloer eng Guideline, déi an deene Froen ass.

Et geet also ëm Froen, wou ee wëllt d'Meenung vun de Bierger kréien an eben och Kloerheet kréie fir eis Aarbechten, fir dann eis Verfassungsreform fäerdeg ze schreiwen. Ech mengen, et ass wierklech kloer, dorëms geet et an ëm soss näischt anescht.

An ech mengen, duerfir kann een als éierleche Politiker och net d'Responsabilitéit vun der Regierung un den Ausgang vun engem Referendum koppelen. Et geet net dodrëms. De Wierler, wat mécht deen de 7. Juni? Dee stëmmt iwwert dräi ganz wichteg Froen fir d'Moderniséierung vun der Demokratie an eisem Land of, an net iwwer eng Regierungsaarbecht. Punkt. Dat ass et de 7. Juni.

Et gi Verrieder vun de Parteien hei an der Chamber, och mäi Virriedner huet dat gemaach, déi de Sënn an och d'Legitimitéit vun engem Referendum respektiv vun deem Referendum a Fro stellen. Ech muss soen, déi aktuell Positioun vun der CSV iwwerrascht dach an engem gewëssene Mooss.

Am Dezember 2013, do huet nach de viregte Fraktiounschef vun der CSV, den aktuelle Kommissiounsprésident, deen huet du bei senger Ried deemools zum Koalitionsaccord vun der neier Regierung gesot, datt d'CSV mat der Iddi vun dem Referendum d'accord sinn. En huet natierlech och gewart virun deenen engen oder aneren Diskussiounen, datt déi net sollten aus dem Rudder lafen. Firwat wëllt elo d'CSV eigentlech näischt méi dovunner wësen?

► **M. Claude Wiseler (CSV).**- Här Berger, wann Der géift e puer Reie widerlesen, da géift Der och kënne soen, datt den Här Juncker gesot hat, e géif heibäi, esou wéi d'Froen gestallt wären, sech froen, ob dat net en Abus vun der Referendumsprozedur wär. Dir musst ëmmer den Text ganz liesen, éier Der Zitatiounen maacht, wann ech gelift!

(Mme Simone Beissel prend la présidence.)

► **M. Eugène Berger (DP).**- Här President, ech hunn effektiv den Text déi lescht Deeg eng kéier duerchgelies an do steet op alle Fall och, datt d'CSV kéint awer mat der Iddi vum Referendum d'accord sinn, datt sech Froen gestallt gi sinn eben iwwert, ech soen net d'Geféierlechkeet, mä awer iwwert de Risiko, datt bei verschiddene Froen herno am Débat an der Populatioun do kéint...

► **M. Claude Wiseler (CSV).**- Jo, an och iwwert déi aner Froen, Här Berger. An et ass genau déi Meenung, déi mer haut och nach deelen.

► **Mme Simone Beissel, Présidente de séance.**- Här Wiseler, wann ech gelift, den Här Berger huet eleng d'Wuert.

► **M. Eugène Berger (DP).**- Op alle Fall stellen ech fest, Madame Presidentin, datt elo d'CSV näischt méi wëllt vum Referendum wësen. Si huet dat jo och elo grad virdru wësse geden. Firwat eigentlech? Eng Vollekspartei, huet déi eigentlech Angscht virun der Meenung vum Vollek?

Och am CSV-Wahlprogramm, wann een dee liest, steet, datt eng Verfassungsrevisioun soll

mat breeder Biergerbedeelegung gemaach ginn. Dann ass eigentlech awer d'Fro: Wat maache mer dann anescht erselxo hei bei deem Referendum, wéi datt mer eng breet Biergerbedeelegung organiséieren? Wat verstitt Dir dann ënner breeder Biergerbedeelegung, déi Der an Ärem Wahlprogramm erageschriwwen hutt an déi Der awer elo net méi wëllt? Dann hätt Der jo och wierklech misse preziséieren, datt et nëmmen ëm absolutt fundamental Froen géif goen, déi sech vläicht an anere Länner gestallt hunn, mä awer net bei eis.

Ech fannen et einfach, Madame Presidentin, schued. Ech bedauern, datt d'CSV sech elo net konstruktiv abréngt an d'Diskussioun ëm de Referendum a si decidéiert huet, da géint all déi Froen ze sinn. Si huet och souguer an engem Zeitungsartikel vun Erpressung geschwat. Och virdru konnt een dat hei esou eraushéieren.

Madame Presidentin, d'Bierger ëm hir Meenung froen, ass dat Erpressung? Ech sinn net där Meenung, datt dat Erpressung ass. Au contraire! Wann een och Sondagë ka gleewen, do gëtt jo deen een oder anere gemaach - ee vun deene leschte vun der ILRES, ech mengen, mat dem „Wort“ zesummen -, do ass jo och erauskomm, datt 77% vun de Leit hei zu Lëtzebuerg, déi gefrot gi sinn, der Iwwerzeegung sinn, datt awer e Referendum eng gutt Saach ass. Also ass dat jo awer och eppes, wou mer op e gewëssene Besoin, op e gewëssene Wonsch, e gewëssenen Ausdrock vun de Bierger kënne reagéieren.

An ech mengen awer och, ech sinn iwwerzeegt, datt e Referendum, eng besser Abannung vun de Bierger och e Moyen géint d'Politikverdrossenheet ass. Wa mer elo all déi Débat wäerte féieren an den nächste Wochen, ass dat d'Méiglechkeet, fir mam Bierger an d'Diskussioun ze kommen, fir mam Bierger iwwert déi Froen ze diskutéieren an den Intérêt vun de Bierger un der Politik nees ze verbesseren an och ze erhéien.

D'DP, déi ass op alle Fall kloer en faveur vun de Volleksbefroungen. Firwat? Well een domadder d'Biergerinnen an d'Bierger mat a wichteg Entscheedung kann abannen. Referende sinn e Stéck vu partizipativer Demokratie, well een eben domat den éffentlechen Débat iwwer wichteg Froen mat de Leit hei am Land ka gestalten.

Madame Presidentin, d'DP, déi wäert de Leit nolauschten an den Débaten. Mir wäerten och d'Meenung vun de Bierger de 7. Juni respektéieren. Et ginn der elo schon, déi soen: Jo, mä de Statsrot huet gesot, datt e Referendum, egal wéi en ausget, net muss bindend sinn, net muss respektéiert ginn. Dat ass zwar sécher wouer.

Et ginn der och, déi soen, datt se eventuell kucken, jee nodeem wéi de Referendum ausget, datt se sech et da géifen iwwerleeën. Fir eis ass et kloer, och wa mer dräi Positiounen am Virfeld hunn zu deene Froen am Referendum, fir eis ass et op alle Fall ganz kloer, egal wéi de Referendum ausget, datt mir dat Resultat wäerte respektéieren an da mat an eis Aarbechten an der Verfassungskommissioun huelen. Ech mengen, dat ass dat, wat wichteg ass. D'DP, déi wäert de Wierlerwille vum 7. Juni respektéieren. Dat géllt fir eis an ech weess och, dat géllt och fir eis Koalitionspartner.

An ech hoffe just, datt och déi aner Parteien de Wierlerwille an d'Meenung vum Bierger wäerten da respektéieren. A virun allem dierf dee Referendum net herno fir parteipolitesch Spiller instrumentaliséiert ginn.

Madame Presidentin, ech kommen zu deenen dräi Froen.

Déi éischt Fro, déi vum Auslännerwahlrecht, ass sécher eng ganz sensibel, jo kontrovers Fro. Et muss ee wëssen, eng Demokratie, déi leeft vun enger gréisstméiglecher politescher Bedeelegung vun hirem Vollek. En Débat iwwert d'Auslännerwahlrecht also an engem Land wéi Lëtzebuerg mat 44%, 45% vu Bierger, déi net d'Lëtzebuurger Nationalitéit hunn, drängt sech jo da färmlech op, deen ass net ze vermeiden.

44%, 45% vun de Leit, déi hei zu Lëtzebuerg wunnen, hunn net eis Nationalitéit, an déi Situatioun, déi féiert jo dann onweigerlech zu där Fro, ob ee widerhi bal d'Halschent vun der Lëtzebuurger Bevëlkerung, déi hei schaffen, liewen, gären hei liewen, Steiere bezuelen, zum Räichtum, jo, do mussen mer och éierlech sinn, ganz oft zum Fonctionnéiere vun eisem Land, vun eiser Economie bäidroen, ob een déi ka komplett vun der Participatioun vu Legislativwahlen ausschléissen.

Oder et kéint een et och aneschters nach formuléieren: Kann ee vu bal der Halschent vun der Populatioun all Flichte verlaangen an hinne op där anerer Säit awer net all d'Rechter ginn, déi déi aner 50% vun der Populatioun hunn? Ech mengen, dat ass eng vun deene kruziale Froen hei.

Oder et kéint een och nach d'Fro stellen: Wëlle mer dorobber histeieren, datt an Zukunft eng

Minoritéit hei am Land iwwer eng Majoritéit bestëmmt?

Ech wëll och an deem Kontext soen, datt d'Wahlrecht fir auslännesch Matbierger jo awer keen Novum hei am Land ass. Dat ass keen Neiland, wat mer hei betrieden. Mir hunn de Maastrichter Vertrag vun 1992, do ass dat festgehal, wou, wou och Lëtzebuerg domat d'accord war: All EU-Bierger dierf an all EU-Land no verschiddene Kritäre bei Kommunalwahlen jo zum Beispill mat viele goen. A mir hunn dat zu Lëtzebuerg jo och nach weider ausgedehnt: datt souguer och Net-EU-Bierger bei eis kënne bei de Kommunalwahlen mat viele goen. Et ass also u sech: D'Wahlrecht fir Matbierger, déi net eis Nationalitéit hunn, dat ass näischt absolut Neies, wat mer hei froen. Mir hunn also och schon Erfahrung domadder.

Et ginn och aner Länner, wou dat esou ass. Ech hunn elo hei Lëtzebuerg als Beispill geholl, well jo elo déi Fro hei eis concernéiert. Mä nëmmen als Illustratioun, an anere Länner gëtt et dat och: Schwäiz, Amerika - also USA -, Kanada, do kënnen d'Ausländer un de Regionalwahlen deelhuele. Et ginn och Länner wéi Chile, Neuseeland, do kënnen Ausländer och, wa se gewësse Konditiounen erfüllen, un all den nationale Wahlen deelhuele.

Mir wëllen also als Koalitioun, och d'Demokratesch Partei, e Schrëtt an d'Richtung vun enger verbesserter Participatioun vun den auslännesche Matbierger goen. Wéi soll dat aussinn? Mir hunn och hei kloer Kritären a Limiten dragesat.

Zum engen ass et jo esou, fir datt ee kann - dat ass jo eis Iddi -, fir an Zukunft dierfe mat vielen ze goe bei de Legislativwahlen: Éischens ass et en aktiivt Wahlrecht, kee passivt Wahlrecht. Et kann een also mat viele goen.

Et ass och fakultativ. Dat heescht, et ass net obligatoresch. Et ass also och eng Differenz: De Lëtzebuurger Bierger, deen net..., oder de Bierger, deen hei zu Lëtzebuerg wunnt an net de Lëtzebuurger Pass huet, dee muss also och eng gewëssen Démarche maachen, esou wéi dat och bei de Gemengewahlen ass, fir sech an d'Wierlerleschten anzeden. E muss also säin Intérêt och doduerjer scho manifestéieren. Dat ass eigentlech och eng Differenz nach zu deem, wat d'Lëtzebuurger als Wahlrecht hunn.

Dann ass et och esou, datt e muss verschidde Konditiounen erfüllen. E muss mindestens zéng Joer hei zu Lëtzebuerg gelieft hunn. Et kann also net sinn, datt ee muer oder iwwermuer oder dräi Woche viru Wahlen oder ee Mount virun de Wahlen op Lëtzebuerg kënnt an da sech kann aschreiw goen. E muss zéng Joer hei gelieft hunn.

Et ass och esou, datt en - an dat ass fir mech och eng ganz, net interessant, mä awer och wierklech eng ganz signifikativ Konditioun -, datt en och scho bei enger anerer Wahl hei zu Lëtzebuerg matgemaach muss hunn, forcément bei enger kommunaler Wahl. An dat ass jo awer och, wou en da gewisen huet, datt en interesséiert ass un der Politik, datt e wëllt eppes matmaachen. Ech mengen, all deene Bierger hei zu Lëtzebuerg, déi dat scho bewisen hunn, firwat soll een deenen dat Recht net kënnen zougestoen?

Et si Kritären eigentlech, wou Verschiddener och soen: „Si sinn nach relativ streng“, datt een eigentlech hätt misse méi wäit goen an et méi no un d'Wahlrecht vun de Lëtzebuurger upassen. Dat sinn der vun alle Säiten. Och zum Beispill, wat ech gelies hunn, sinn do verschidde Leit aus enger Denkfabrik vun der CSV oder CSJ, déi fannen, datt se éischens derfir sinn, datt d'Participatioun vun den Ausländer bei de Wahlen opgemaach gëtt. A si fannen, datt eigentlech déi heite Proposition nach vill ze streng wier.

Ech wëll awer och eppes hei betounen, Madame Presidentin, dat ass, datt mer awer och widerhin op där anerer Säit müssen all Efforte maachen, fir eng gesellschaftlech a politesch Integratioun ze maache vun de Leit. Duerfir soll natierlech och widerhin e prioritäre Wee praktesch fir d'Integratioun sinn, datt een och d'Ausländer iwwerzeegt, fir d'Lëtzebuurger Nationalitéit unzuhuelen, wat also sécherlech e wichtegt Element ass vun der Integratioun.

Mä nach eng kéier: Et muss ee wierklech ënnerscheeden tëschent enger Nationalitéit an op där anerer Säit engem Wahlrecht. Dat sinn an eisen Aen zwou verschidde Saachen, besonnesch an engem Land ebe wéi eisem, wou ronn 45% vun de Bierger hei net d'Nationalitéit hunn. Do sinn et der och, wou dat och net méiglech wier, well se zum Beispill aus engem Land kommen, datt d'duebel Nationalitéit net erméiglecht. Do ginn et eng Rei Länner nach an Europa, zum Beispill Dänemark, Holland, Eisträich, Polen, do ass dat net méiglech. Dat heescht, fir déi Leit hei, wa mer deene soen: „Jo, kuckt iwwert de Wee vun der duebeler Nationalitéit!“, fir déi ass dat onméiglech.

(Interruption)

Wéi gesot, eng Oplockerung vun engem Nationalitéitengesetz bedeit eng wesentlech Verbesserung an eiser Integratiounspolitik. Si léist awer net alleguerten d'Problemer vun der politescher Participatioun.

An hei wëll ech awer och nach eng Remarque maachen zu deem, wat mäi Virriedner, den Här Wiseler, gesot huet. En huet jo och hei eng Proposition de loi erabruucht fir dann eben elo an déi Richtung, déi si wëlle favoriséieren - wat awer an eisen Aen net eppes derzou bäidréit zu der politescher Participatioun -, datt een elo géif eben dat vereinfachen, fir d'Lëtzebuurger Nationalitéit kënnen ze erlangen.

Ech muss soen, ech sinn nëmmen erstaunt, datt elo d'CSV dat proposéiert: vu siwen op fënnf Joer erof! Nach virun e puer Joer huet den deemolege Minister Biltgen plädéiert, fir ebe grad et eropzesetzen an och d'Sproochen-ufuerderungen eropzesetzen. Elo geet et also erëm eng kéier genau deeselwechte Wee no hannen. A praktesch zwee, dräi Joer oder emol net fënnf Joer, nodeems se fir dat eent hei plädéiert hu mat grousser Ferveur, plädéiere se elo fir eigentlech genau de Géigendeel. Do gesinn ech ganz weing Kohärenz derhannert.

(Interruption)

Madame Presidentin, d'DP steet dozou, datt och Netlëtzebuurger, déi bewisen hunn, datt se sech hei am Land wuelfillen, sech hei integréiert hunn an och politesch interesséiert sinn, datt déi hei kënnen, dierfe viele goen! An ech mengen, déi streng Kritären, déi stellen och sécher, datt elo keen Ausverkauf vun eiser Demokratie hei bedriwwen gëtt an datt dat hei och éischter en Zeechen ass vun enger besserer, enger richteger Participatioun.

Mir hate jo och schonn ähnlech Diskussiounen deemools, wéi d'Wahlrecht fir d'Ausländer op kommunalem Niveau agefouert ginn ass. Ech mengen, do sinn heiansdo ähnlech Argumenter ugefouert ginn. A mir hu jo am Endeffekt gesinn, datt d'Welt hei zu Lëtzebuerg net zesummegebrach ass, mä au contraire, datt mer eigentlech haut, wann een de Bilan zitt vun deem, wat an de Gemengewahlen méttlerweil vun der Participatioun bei de Wahlen stattfënt - d'Ausländer, déi sech aschreiven an esou weider -, datt mer eigentlech bedauern, datt der net genuch drun deelhuele, an datt mer eis eigentlech géife wënschen, datt der do och nach méi sech géifen abréngen an dat lokalpolitesch Gescheien, d'Matbestëmmung. An ech hei mengen ech, wa mer géifen déi Bestëmmung bis an eis Verfassung schreiwen, datt do net géif vun haut op muer hei d'Welt ënnergoen.

Et ass natierlech kloer, de Referendum iwwert d'Auslännerwahlrecht ass eng Fro iwwert déi gesellschaftlech Kohäsioun, iwwert d'Integratioun an de generellen Émgang mat all de Bierger hei zu Lëtzebuerg, déi hei wunnen, schaffen a liewen. An et ass eng sensibel Fro. Duerfir soll een och hei wierklech net a bëllege Populismus verfallen.

Ech mengen, et ass hei e Kompromiss, eng Kompromissformel, déi hei proposéiert gëtt. An et ass do wierklech och meng - net nëmme meng - Suerg, datt mer hei an deenen nächste Wochen, wa mer d'Débaten hunn, do anstänneg Diskussiounen hunn, datt mer do net versichen, d'Land ze splécken op déi eng an op déi aner Säit, datt mer net an de Populismus verfallen.

An ech mengen, do ass et och wichteg, datt d'Chamber hir Aufgab iwwerhëlt - mir hu jo do eng Rei Débaten, déi mer wäerten organiséieren -, datt mer d'Leit informéieren, datt mer do, op gutt Lëtzebuergesch gesot, Niveau behalen a wierklech d'Saachen objektiv kënnen duerstellen. Ech mengen, dat ass eppes, wat all Volleksverrieder, mengen ech, och muss sech als Virsaz huelen: datt mer respektvoll mat deenen aneren, awer och respektvoll vis-à-vis vun deene verschiddenen Iddien iwwer eis Matbierger, datt mer do respektvoll domadder ëmginn an datt also och d'Chamber do eng grouss Aufgab huet, fir eng uerdentlech Campagne ze maachen. Ech mengen och, an deem Kontext hunn och sécherlech d'Medien eng wichteg Roll ze spillen.

Ech kommen zu där nächster Fro. Dat ass déi vum Wahlrecht ab 16 Joer. Ech hu selwer als Auteur vu verschiddene Proposition-de-loien an deem Kontext hei méi wéi eng kéier op der Chambertribün schonn driwwer geschwat an argumentéiert. A mir haten hei och scho Chambersitzungen, wou dat als Proposition de loi diskutéiert ginn ass.

Duerfir kann ech och net dat Argument novollzéie vu mengem Virriedner, datt mer hei nach



ni driwwer geschwat hätten, datt den Exposé des motifs oder d'Argumentatioun an der Proposition de loi elo relativ moer wieren. Ech mengen, mir kënnen genuch Débaten an der Chamber noliesen, wou mer doriwwer hei diskutéiert hunn an deem Plenum, an datt och scho ganz vill an der Bevelkerung, och ënnert deene Jugendlechen, doriwwer diskutéiert ginn ass.

Ech mengen, et sinn e puer, ech wëll och net... Wéi gesot, als Auteur vu Propositions de loi zu deem Sujet kéint ech elo hei ganz laang, stonelaang driwwer schwätzen. Vlächnt nëmmen e puer Haaptiddien, dat ass: Déi politesch Entschéedunge vun haut, déi beaflosse jo awer ganz vill natierlech déi aktuell Generatioun, mä awer och déi nächst Generatioun, déi scho praktesch hannendrun ass. An eigentlech awer huele mir, déi aktuell Generatioun, Décisiounen fir déi, déi net kënnen selwer matbestëmmen, wat sécherlech net ideal ass.

Mir hunn och eng Gesellschaft, déi ëmmer méi al gëtt, déi natierlech dann och eng grouss Lobby duerstellt. A sécherlech ass och e grouse Risiko do, datt herno d'Politiker da vlächnt éischter d'Tendenz hunn, no de Besoinen an den Intérète vun enger méi eelerer Populatioun ze kucken an déi Jonk, déi eventuell net kënnen matbestëmmen, net kënnen mat wielen, dann natierlech e bëssen op der Säit loossen.

Ech mengen, et ass kloer, datt och hei eben eng Form ugestriift gëtt, fir ebe concernéiert Bierger hei zu Lëtzebuerg mat anzebannen an en Décisionsprozess, weinstens se kënnen mat anzebannen, datt se iwwert déi Leit kënnen decidéieren, déi fir si Décisiounen sollen huelen.

Wéi gesot, och d'DP, déi fuerdert scho säit Joren en Erofsetze vum Wahlalter op 16 Joer. Ech hunn op meng Proposition de loi verweisen. A virun allem hei weist sech jo och, firwat datt déi Fro eng absolutt Berechtigung am Referendum huet.

Bei där leschter Diskussioun iwwer eng Proposition de loi zu deem Sujet huet de Statsrot nämlech gesot, dat wier keng technesch Fro am Endeffekt. En hat keng Problemer mat den Artikelen, déi ech geschriwwen hat, an och mat där Argumentatioun. Mä d'Konklusioun, dat kann een noliessen, vum Statsrot war, et ass eigentlech keen technesch, juristesche Problem, et ass eng politesch Fro. Eng politesch Fro, déi ee muss op enger anerer Plaz léisen. Voill, émsou méi, ech mengen, do seet eis jo awer de Statsrot, et ass eigentlech praktesch eng Invitatioun, fir esou eng Fro iwwert de Referendum klären ze loossen.

Et gëtt jo och da gäre gesot, datt déi Jonk sech vlächnt net esou interesséieren oder net fäeg sinn, fir do responsabel sech eng Meinung ze maachen. Jo, sécherlech muss ee kucken, datt een deene Jonken eng gewëss politesch - „politisch“ - tëschtent Gänsefeisercher -, also eng politesch neutral Bildung gëtt an datt een dann do den Intérêt an d'Responsabilitéit fir d'Politik awer och kann erwächen.

Op där anerer Säit muss ech awer soen, déi Argumenter, déi een ëmmer fir déi vu 16 a 17 ufëiert, datt déi net genuch politesch Bildung hätten, net genuch Responsabilitéit, datt dat da fir déi vun 18, vun 23, vu 37, vun 43 net méi soll gellen. Ech mengen, sécherlech soll een dat hei maachen. Mä méi generell solle mer eis awer och emol déi Fro stellen, wéi insgesamt eis Leit dobaussen, eis Biergerinnen a Bierger informéiert sinn, politesch responsabel denken an esou weider. Ech muss heiands soen, wann ech Saache liesen op Foren, an de Medien, do kann ech mer awer Froe stellen!

Och hei muss ech betounen, et ass e fakultatíivt Wahlrecht. Et ass also net e komplett Wahlrecht eigentlech wéi fir déi ab 18 Joer. Dat heescht, et kann ee viele goen. Wann ee sech prett spiert, kann ee mat viele goen, et muss een net mat viele goen. Et ass grad wéi fir déi mat 75 Joer. Virun e puer Joer ass dat jo och hei agefouert ginn. Do ass och net d'Diskussioun gewiescht: firwat net mat 74, mat 77? Et ass du gesot ginn, mat 75 Joer. An och do huet een zum Beispill awer praktesch deeselwechte System, datt et fakultatíiv ass.

Och hei vlächnt e Bléck eriwuer an d'grouss, wäit Welt respektiv an d'Nopeschlänner. Zum Beispill an Däitschland gëtt et néng Bundesländer, wou déi mat 16 a 17 Joer un de Kommunalwahlen kënnen deel huelen, véier Bundesländer, wou déi un de Landtagswahlen kënnen deel huelen, zum Beispill zu Hamburg. Virun zwou Wochen, mengen ech, war et, hunn déi 16- a 17-Jähreg dierfe mat wielen. An Eisträich ass et ab 16 Joer fir Kommunal- a Landeswahlen. A Brasilien ass et och ab 16 Joer fir allequerten d'Leit am Land.

Op alle Fall, wat ee gesäit zum Beispill an Däitschland, déi verschidde Bundesländer, déi hu positiv Erfahrungemaach mat dem Wahlalter ab 16. Do gesäit een, datt awer dann déi Jonk, déi kënnen, si mussen net, mä déi kënnen mat viele goen, déi interesséiere sech dättelech méi fir Froen vun der Politik, fir Froen vun der Gesellschaft, wéi zum Beispill déi, déi nach net kënnen mat viele goen. Well déi soen, et concernéiert mech souwisoen jo net, et ass eréischt fir méi spéit. An dann entwéckele se vlächnt net dee responsabele politesche Geescht, wou et awer gutt ass, wa mer deen esou fréi wéi méiglech kënnen entwéckelen.

Dann nach déi lescht Fro, déi beschäftegt sech mat der Limitatioun vun de Ministermandater, wat jo virdru fir méi héich Wellen hei gesuergt huet. Ech mengen, et ass kloer, eise Lëtzebuerger Wahlsystem, dee favoriséiert d'Wiel an doduerjer natierlech och d'Mise en place vu Käpp, déi méi bekannt sinn, déi scho laang vlächnt och an enger Regierung waren.

Wat bedeit dat am Endeffekt, egal wéi, wa Ministere laang kënnen am Amt sinn? Dat bedeit - da si jo och d'Parteigrenzen ewech, dat ass elo net un déi eng oder aner Partei gericht -, datt dann e Renouveau innerhalb vun enger Regierung nëmme lues virugeet. Ech mengen, mir kennen d'Beispiller. Mir hunn der jo virdrun och héieren, wou Ministere praktesch eng Institution gi sinn, déi bal inamovible waren!

Mir sinn iwwerzeegt, datt och um Niveau vun der Exekutiv, vun der Regierung muss eng Alternance, eng demokratesch Alternance do sinn. Dat ass gesond fir all Demokratie. An ech mengen, och grouss, wichteg Länner, déi Weltmuechte sinn, wéi zum Beispill d'USA, déi praktizéiere jo déi demokratesch Alternance. Do kann zum Beispill de President net méi wéi zweemol gewielt ginn. Ech mengen, dat ass also och eppes, e kloert Signal hei virun allem, datt mer wëlle soen: Politik - dat ass och eis Iwwerzeugung -, Politik, dat ass kee Beruff, et ass e representatiivt Mandat fir eng begrenzten Zäit.

An ech mengen, grad bei Ministeschposten, wou jo och vill Pouvoir domadder verbonnen ass, ass et och wichteg, datt do eng regelméisseg Erneuerung kënnt, fir datt eventuell och - einfach, ech soen et elo abstrakt - awer de Risiko vun Abusen net soll gi ginn. An nei Gesichter an der Politik sinn eben einfach wichteg, wann ee wëllt neie Wand, nei Iddie mat erabréngen.

An déi virgeschloen Fro hei, déi erméiglecht jo dann, ebe mat enger politescher Alternance an Erneuerung, eben dann, oder déi politesch Alternance duerch regelméisseg Ministermandater ze erneieren, fir dann déi Alternance ze fërderen.

Ech wëll och kloer soen - dat war virdrun och hei kuerz zitéiert ginn -, jo, et ass eppes anescht, wéi wann een elo géif soen, mir verbidden dem Wieler, fir nach eng Kéier Leit kënnen ze wielen. Dat ass och kloer. Lei geet et wierkelech nëmmen ëm Regierungsmemberen, déi designéiert ginn. Mir wëllen nämlech net, datt de Bierger dobaussen net méi de Choix hätt, fir kënnen e Politiker ze bestëmmen oder e Politiker an d'Chamber ze huelen. Dat wëlle mer wierkelech net. Dat wier eigentlech konträr zu dem partizipative Gedanken, dee mer wëlle weider fërderen.

Madame Presidentin, ech kommen zu de Konklusiounen. Ech mengen, d'Majoritéit huet hei équilibréiert Froe fir de Referendum vum 7. Juni formuléiert. Et si Froen, déi et eis erlaben, eis Verfassung, eis Demokratie un dat 21. Jorhonnert unzepassen, ouni d'Gesellschaft ze splécken.

D'DP ass eng Partei vum Fortschritt, eng Partei, déi net zu allem Nee seet, mä sech kloer fir eng Weiterentwicklung an eng Modernisierung vun eiser Gesellschaft aasetzt, dëst an engem demokrateschen a partizipative Prozess. Duerfir steet d'DP och fir dräimol Jo de 7. Juni.

Dëse Referendum ass aussergewöhnlech an eiser Geschicht, well en et wäert erméiglechen, datt wichteg gesellschaftlech Froen net laanscht d'Vollek, mä mat de Leit beäntwert ginn.

Duerfir kann ech, Madame Presidentin, och de vollen Accord vu menger Partei zum Gesetz, zu engem Referendum, dësem Gesetz vun engem Referendum de 7. Juni an deene verschiddene formuléierte Froen abréngen. An duerfir ginn ech also och den Accord vu menger Fraktioun zu dëser Proposition de loi.

Ech soen lech Merci.

► **Une voix.** - Très bien!

► **Mme Simone Beissel**, *Présidente de séance.* - Merci dem Här Eugène Berger. Als nächste Riedner ass agedroen den Här Franz Fayot. Här Fayot, Dir hutt d'Wuert.

► **M. Franz Fayot** (LSAP). - Merci, Madame President. Madame President, léif Kolleginnen, léif Kollegen, wa mer haut iwwert dës Proposition de loi Bodry-Loschetter-Berger diskutéieren an ofstëmme, ass dat e wichtige Schrëtt an d'Richtung vun der Ëmsetzung, net

nëmme vum Regierungsprogramm ënnert dem Kapitel „Renouveau démocratique“, mä och vum LSAP-Wahlprogramm vum 2013. De Prinzip vun enger Verfassungsreform mat direkter Volleksbedeelegung iwwer zentral Froen ass am Programm vun eiser Partei virgesinn.

Besonnenesch wat d'Wahlrecht ugeet, huet d'LSAP sech fir d'Opmaache vum aktive Wahlrecht fir Ausländer a fir mannerjäreg Lëtzebuerger tëschtent 16 an 18 Joer, an deenen zwee Fäll op enger fräiwëlleger Basis, staarkgemaach. Mir begrëssen dofir, dass onse Partei-programm zu engem gudden Deel vum Regierungsprogramm iwwerholl gouf an elo mam Vote vun dëser Proposition de loi um gudden Wee ass, ëmgesat ze ginn.

Zweck vum Ausländerwahlrecht ass et, e reellen Demokratiedefizit an eisem Land ze behiewen. Mat 44% Ausländer ass eist Land weltwäit an enger eenzegartegeger Situatioun. Déi Ausländer, déi hei liewen, wunnen a schaffen, sollen duerch d'aktiivt Wahlrecht mat an de politeschen Entscheidungsprozess agebonne ginn. Dëst ass en zentraalt Uleies an engem Land, dat sech gären op eng modern Opfaassung vum demokratesche Rechtsstat be-riift.

Déi zweet Fro betrëfft dat aktiivt Wahlrecht fir jonk Lëtzebuerger tëschtent 16 an 18 Joer op enger fakultativer Basis fir all Wahlen. Hei geet et drëm, déi Jonk un d'Politik erunzeféieren, op jidde Fall déi, déi sech derfir interesséieren, a se esou an d'Politik anzebannen. Fir dat fäerdegzibréngen, muss onst Land an d'politesch Bildung investéieren.

Mä och déi drëtt Fro iwwert d'Begrenzung vun der Dauer vun de Ministeschmandater op zéng Joer ouni Ennerbriechung huet mam gudden Fonctionnéiere vun engem moderne Stat ze dinn. An et geet hei net drëm, wéi muncher dat behaupten, der CSV eng auszewëschen. Et geet net drëm, ze verhënnern, dass sech erëm e Besch, e Werner, e Santer oder e Juncker kann opbauen, deen dann 20 Joer oder méi Premier ka bleiwen, mä et geet hei villméi ëm eng reell Erneuerung vum politesche Personal an esou och vlächnt Leit dozou ze bewegen, Politik ze maachen, ouni sech e Liewe laang exklusiv enger politescher Carrière ze verschreiwen oder fir ëmmer hir berufflech Carrière mussen opzeginn.

D'Begrenzung vun der Dauer vun de Ministeschmandater op zéng Joer ouni Ennerbriechung gëtt dofir vun der LSAP-Fraktioun be-gréisst an och ënnerstëtzt. Et war jo och ursprénglech d'Iddi vun eise Spitzekandidat Etienne Schneider, déi hire Wee iwwer eise Wahlprogramm an de Regierungsprogramm fonnt huet. Mir hoffen, dass dëst e Sënneswandel an d'Erneuerung an d'Diversifizierung an eisem politesche Personal mat sech bréngt.

Dat gesot, däréi een awer net verkennen, dass d'Longévitéit vum politesche Personal zu Lëtzebuerg enk mat eise Wahlsystem zesummenhänkt. An enger gutt funktionnéierender Demokratie ass d'Alternance Normalitéit. An et ass an alle parlamentareschen Demokratien aussergewöhnlech, dass Ministere méi wéi zéng Joer onënnerbrach am Amt sinn. Am Fong misst dës Regel, iwwert déi mer d'Bierger elo consultéieren an déi et an där Form, menges Wëssens op alle Fall, néierens gëtt, ganz seelen zum Spille kommen, oder si misst vun de Par-teie selwer duergesat ginn.

Mä hei spillt eisen extrem personaliséierte Wahlsystem eng net onwesentlech Roll: Well d'Parteien an engem System mat Panachage ofhängeg vu populäre Perséinlechkeete sinn, ass eng Mise à l'écart vun engem besser gewielte Minister zugonschte vun engem man-ner gutt gewielte Kandidat keng Selbstver-ständlechkeet. Souguer wann dës Regel kënnt, iwwert déi mer elo an dësem Referendum wë-len ofstëmme, an d'Meenungsemfroeweise jo, dass dëst ganz probabel ass, kënnt een hei nawell net laanscht eng Reflexioun iwwer eng Reform vun eise Wahlsystem.

Madame President, déi zwou wuel wichtegst Froen an deem konsultative Referendum be-treffen d'Wahlrecht vun den Ausländer a vun de mannerjährege Lëtzebuerger.

Wat d'Wahlrecht vun den Ausländer ugeet, esou ass en zentraalt Argument, wat een ëm-mer erëm dergéint héiert, dat vun der Kopp-lung vum Wahlrecht mat der Nationalitéit. An et héiert ee jo vum CSV-Sprieder, dass dëst och am Fong nach ëmmer de Lien ass, deen d'CSV wëllt oprechterhalen, deen tëschtent Wahlrecht an Nationalitéit. D'Wahlrecht wär en fait en Attribut vun der Nationalitéit, dat deene Leit virbehale wär, déi Lëtzebuerger sinn.

► **Une voix.** - Très bien!

► **M. Franz Fayot** (LSAP). - Mä et gëtt och eng aner, an den Ae vun der LSAP-Fraktioun vill méi valabel an der heiteger Zäit besser uge-passte Statstheorie. Héich diversifiéiert Gesell-schafte ginn haut gepräagt duerganz diversif-ifiéiert Populatiounen.

Dat ass fir Lëtzebuerg näischt Neies, well et do, wou et geopolitesch läit, am Laf vu senger Ge-schicht Migratiounen ausgesat war. Ons Gesell-schaft kennt Immigrationen vu villen Zorten: Si kennt de fréien Zougang während méi oder wéineger laange Periode vun Aarbechter, Kade-ren, Spezialisten, Experte vun allen Zorten, also vu Mënschen a Familljen aus aller Häre Länner, déi heihinnerkommen. Lëtzebuerg ass e gutt Beispill fir esou eng Zort modern Gesellschaft, déi näischt méi mat där Gemeinschaft ze dinn huet, wéi mer se nach viru 50 Joer a méi kannt hunn.

An esou enger Gesellschaft gëtt et e staarke Lien: nämlech dee vun dem Grondgesetz, vun der Verfassung. D'Verfassung schafft Normen fir de Stat a fir déi, déi zu dësem Stat gehéieren, egal wou se hierkommen a wéi hir Vergaangen-heet ass. Dës Normen erlaben en Zesumme-liewen an en Zesummeschaffen. Dës Iddi ass net nei, et fënnt ee se schonn zu Roum am Ci-cero senger „Republik“. Och fir den Cicero war d'Biergerschaft d'Rechtsgemeinschaft vun de Bierger, déi op d'Grondgesetz baséiert.

De Philosoph Immanuel Kant huet de Stat als eng „Vereenigung vu Mënschen ënner Rechtsgesetz“ bezeechent.

Eng ähnlech Konzeptioun fënnt een och an der franséischer Constitutioun, direkt no der Fran-séischer Revolutioun. Do kann ee liesen, an der Constitutioun vu 1793 am Artikel 4: «Tout étranger âgé de 21 ans accomplis, qui, domicilié en France depuis une année, y vit de son travail, ou acquiert une propriété, ou épouse une Fran-çaise, ou adopte un enfant, ou nourrit un vieil-lard, tout étranger enfin qui sera jugé par le corps législatif avoir bien mérité de l'humanité, tout étranger est alors admis à l'exercice des droits de citoyens français.» E schéinen Text!

Wie sech der Norm ënnerwerft, déi an de Geset-zer an an der Verfassung vun engem Land fest-geluecht ass, deen ass also e Bierger vun deem Land, ass en Deel vun der Rechtsgemeinschaft, déi an deem Land besteet. Déi Rechtsgemein-schaft ass demokratesch regéiert, wann déi Leit, déi dorunner deel huelen, d'Wahlrecht hunn.

An esou enger Konzeptioun vum Stat als Con-trat social tëschtent gläichberechtigte Bierger, déi sech all engem gemeinsame Grondgesetz an engem Korpus vu Gesetzer ënnerwerfen, ass d'Wahlrecht kee Privileg méi, dat mat der Na-tionalitéit zesummenhänkt. Et ass e Mënsche-recht!

► **Une voix.** - Très bien!

► **M. Franz Fayot** (LSAP). - D'CSV wëllt be-kanntlech éischter iwwert de Wee vun der Na-turaliséierung vun Ausländer un d'Fro vum Wahlrecht erugeen. Si wëllt deenen Ausländer, déi Lëtzebuerger wëlle ginn, de Wee zur Na-tionalitéit elo - relativ neierdengs - méi licht ma-chen, zum Beispill iwwer manner schwéier Sproochenufuerderungen, an domat och den Zougang zum Wahlrecht fir esou vill wéi méiglech Ausländer opmaachen.

Dat heescht awer nach ëmmer, dass d'Wahl-recht, also d'Recht, am Stat matzestëmmen, vun der Statszougehéieregkeet ofhänkt. Déi Awunner, déi dat Wahlrecht net hunn oder net wëllen hunn, aus verschiddearten Grënn, sinn zwar de Gesetzer an hirem individuelle Liewen ënnerworft, kënnen awer net dozou bäi-droen, déi Gesetzer matzestëmmen.

Et gëtt eng aner Konzeptioun vum Statsrecht, déi seet, dass et eng Menschenwürde gëtt, onofhängeg vun der Statszougehéieregkeet, déi d'Basis vun de Grondrechter ass an och vun der Demokratie.

► **Une voix.** - Très bien!

► **M. Franz Fayot** (LSAP). - An där Optik kann een d'Wahlrecht vun der Nationalitéit lassléisen a se och op Biergerinnen a Bierger iwwerdroen, déi an engem Land liewen, schaffen, Kanner erzéien, Steiere bezuelen, Verflchtungen hunn an esou weider, awer net d'Nationalitéit vun deem Land hunn.

Déi Theorié sinn net op menger Mëscht gewuess. Si kann een zum Beispill noliesen, no-tamment an der Interventioun vum Professor Thomas Groß, Professor fir Verfassungsrecht zu Osnabrück, deen dat an engem Hearing beim Däitsche Bundestag gesot huet 2013, an och an engem Artikel vun engem anere Professor, dem Professor van Ooyen, deen dat publizéiert huet an enger Note vun der Friedrich-Ebert-Stiftung iwwert déi Froen.

Et muss een natierlech zouginn, dass déi tradi-tionell Verbindung vu Wahlrecht - egal op wat fir engem Niveau - an Nationalitéit nach ëm-mer déi heefegst an der Welt ass, well an de meeschte Länner d'Zuel vun den auslännesche Bierger relativ niddreg ass. Mä och do ass an deene leschte Jorzéngten eng Entwécklung feststellen: D'Migratiounen huelen zou, net nëmmen, well Mënschen zum Beispill no Eu-ropa komme wëllen, fir do e bessert Liewen ze hunn, mä virun allem awer brauchen déi héich



entwéckelt Länner - wéi mir an Europa oder an den USA - Aarbechtskräften, well hir Demografie dat net méi hiergëtt. An dofir gëtt et déi Diskussioun iwwer Nationalitéit a Wahlrecht iwwerall.

Esou Entwécklung sinn net ëmmer einfach, weder fir d'Mënschen, déi kommen, nach fir déi, déi do sinn. Si verlaangen, zesummen ze sinn an net géinteneen.

► **Une voix.**- Très bien!

► **M. Franz Fayot (LSAP).**- Déi Entwécklung si besonnesch an den zwee leschte Jorzénge weidergaangen an hunn ons Gesellschaften ëmmer méi oppe gemaach. Si hunn awer och ëmmer erëm zu Spannunge gefouert a féieren och haut nach zu esou Spannungen, wann een zum Beispill rietsextrem Tendenzen a Länner ronderëm ons gesäit opkommen.

Et muss een drun erënneren, wéi schwéier et fir Lëtzebuerg, beim Vertrag vu Maastricht 1993 d'europäesch Biergerschaft an domat d'kommunaalt Wahlrecht fir net Lëtzeburger Unionsbürger anzeféieren. Déi gréissten Horrorseenarie gouf vu verschiddene Säiten deemools évoquéiert: D'Ausländer géifen d'Muecht am Land an an de Gemenge mat héijen Ausländerzuelen iwwerhuelen.

Lëtzebuerg huet deemools nëmme mat gréisster Virsiicht dat Wahlrecht ugeholl. Et gëtt elo nach eng Ausnahmeregelung fir ons am Traité sur le fonctionnement de l'Union européenne, am Artikel 22 Paragraf 2, dat heescht fir Länner, déi méi wéi 20% Ausländer an hirer Bevëlkerung hunn. An d'Europäesch Kommissioun mécht all Joer e Rapport iwwert d'Situatioun an deene Länner.

Lues a lues hu mer awer an deene leschten zwanzeg Joer agesinn, dass dat Wahlrecht keng Katastroph fir Lëtzebuerg war an och nach ëmmer keng ass! Mir hunn duerno souguer dat kommunaalt Wahlrecht op Bierger aus Drëttstaten ausgedehnt. A Lëtzebuerg ass do-uerch nach ëmmer net zesummegebrach, bien au contraire! Lëtzebuerg huet sech brillant entwéckelt, wirtschaftlech grad wéi kulturell. Mir hunn eng ganz oppen, tolerant Gesellschaft, an där d'Lëtzeburger mat villen Ausländer gutt eens ginn.

Mä déi wichteg verfassungsrechtlech Lektien aus dem Vertrag vu Maastricht war an ass eben, dass duerch d'Citoyenneté européenne d'Wahlrecht, an zwar dat aktiiv a passiv, vun der Nationalitéit getrennt gouf. Et war fir d'Eischt, dass et méiglech war ze wien, wou ee gelieft huet, dat heescht matbestimmen, ouni Lëtzeburger ze sinn.

Am Ausland gëtt et e puer Länner, e puer Beispiller: Chile, Uruguay, Ecuador, Neiseeland, wou d'Wahlrecht fir Ausländer och fir Legislativwahlen agefouert gouf. Neiseeland ass e speziell liberaalt Beispill, well et do keng Residenz-konditioun gëtt. Dat Land huet dat gemaach. Et ass och e Land mat enger grousser auslännescher Bevëlkerung. An do gesäit een, dass d'Wahlrecht fir all Institutionen absolutt akzeptéiert ass, mat exzellenten Erfahrungen.

Iwwert d'Auswierkung vum esou enger Politik schreiwen zwee Auteuren am „New Zealand Journal of public and international Law“, dass déi Participatioun vun Immigranten de Prozess vun der politescher Integratioun accélériert huet an doduerch tëschent Immigranten an Autochthonen eng harmonesch Gemeinschaft entstanen ass, déi op alle Pläng ganz schnell zummewiisst.

Wat d'europäesch Biergerschaft ugeet, huet et sécher laang gedauert, bis auslännesch Biergerinnen a Bierger no an no vun där Zort vu Participatioun Gebrauch gemaach hunn. An och haut ass dat nach net evident, Ausländer dozou ze bréngen, sech fir d'Lëtzeburger Politik ze interesséieren.

Mir hunn dofir Ustrengungen op alle Pläng ënnerholl. Mir hunn onst Wahlgesetz geännert, fir op d'Netlëtzeburger zuzugehen, zum Beispill, dass mer d'Délaie verkierzt hunn, fir sech an d'Wielerleschten anzuschreiwen, dass mer d'Openthaltsdauer verkierzt hunn. D'Parteien hunn och matgespillt, soudass haut eigentlech am Land eng positiv Stëmmung besteet, fir eng politesch Gemeinschaft tëschent Lëtzeburger an Netlëtzeburger opzebauen.

Mä et bleift fir en Netlëtzeburger schwéier, sech an dat Lëtzeburger politesch Liewen ze knéien, et ze verstoen a matzemaachen. Och an de Parteien, wou mer net Lëtzeburger Biergerinnen a Bierger integréieren, gesi mer, dass een d'Wahlgesetz an déi spezifesch politesch Mentalitéiten a Praktiken erkläre muss, déi historesch entstanen sinn. An esou wäert et och wuel mam Ausländerwahlrecht fir d'Chamber goen.

Dofir ass d'Diskussioun net nëmmen déi vum Wahlrecht, mä virun allem vun der Manéier, wéi dat Wahlrecht exercéiert gëtt, wéi d'politisch Liewe praktizéiert gëtt, wéi d'Kommunikatioun organiséiert gëtt. An do sti mer ganz

am Ufank vun der Reflexioun. An Däitschland hu se en Institut fir politesch Bildung. A villen demokratesche Länner gëtt et Stëftungen, déi déi politesch Reflexioun an Diskussioun weiderdreien.

Mir sinn zu Lëtzebuerg net ganz wäit komm, bis elo, an deene Saachen. Ech sinn zwar der Meenung, dass mer parallel zu der Mesure vum Ausländerwahlrecht wéi och beim Wahlrecht vu 16 Joer un ons eppes afale loosse mussen, fir d'Gestaltung vun der Politik an d'Verständnis vun de politesche Prozesser méi verständlech ze maachen. Et wär interessant, wéi dat am Regierungsprogramm an och an onsem Parteiprogramm steet, d'Iddi vun de politesche Fore weiderzedreien. Et geet net mat enger Versammlung duer! Et muss een der schonn eng Partie organiséieren, fir unzekommen an iwwert d'Medien an d'sozial Netzwerker Iddien eriwuerzebréngen.

(**M. Mars Di Bartolomeo reprend la présidence.**)

Här President,...

► **M. Mars Di Bartolomeo, Président.**- Jo.

► **M. Franz Fayot (LSAP).**- ...d'LSAP bekennt sech kloer zum Jo zum Wahlrecht fir Ausländer, déi säit zéng Joer hei am Land gewunnt hunn an déi scho virdru bei Gemengen- oder Europawahlen hei am Land matgemaach hunn. Fir d'LSAP ass dëst Wahlrecht e wichtegen Deel vun der Integratioun a vum Zesummeliewen an engem modernen an oppene Land wéi eisem.

Et huet awer näischt mat der Nationalitéit ze dinn. An dofir soll een dës Diskussioun an eisen Aen och net mat där iwwert d'Nationalitéitgesetz verméschen.

► **Plusieurs voix.**- Très bien!

► **M. Franz Fayot (LSAP).**- Här President, léif Kolleginnen a Kollegen, mir schwätzen awer net nëmmen iwwert d'Ausländerwahlrecht, mä och iwwert d'Wahlrecht fir manerjähreg Lëtzeburger tëschent 16 an 18 Joer. International gëtt et zéng Staten, wou jonk Leit ënner 18 Joer wéi kënnen. An der EU ass Eisträich dat eenzegt Land, wou dat méiglech ass.

Et gëtt vill Argumenter, fir déi Jonk méi an de politesche Prozess anzebannen, an zwar scho ganz fréi. Duerch d'Participatioun un de Wahlen si si responsabiliséiert. Si kënnen bei Décisiounen matschwätzen, déi si an hirem ganze Liewe bestëmmen. Well d'Gesellschaft ëmmer méi al gëtt, ass et gutt, och déi Jonk méi staark erunzeéien. D'Politik brauch och de Point de vue vun deene Jonken. Ons Zäit ass eng vun der méiglechst breeder Participatioun an der Gesellschaft. Firwat géife mer do déi Jonk ausschléissen?

Nu constatéiert een awer an de Sondagen, dass déi Jonk tëschent 16 an 18 Joer selwer net begeeschtert sinn, bei der Politik matzemaachen. Och dat ass ënnersicht ginn. De Grond fir dee Mangel u Begeescherung wär eng Mëschung vun Onsécherheet a Seriositéit: d'Onsécherheet, capabel ze sinn, dee ganze System ze verstoen, an d'Entfremdung - et kann een dat wuel och „Politikverdrossenheet“ nennen -, eng Incompréhension virun der Politik.

De Professor Hurrelmann, deem d'Shell-Studien iwwert déi Jugendlech pilotéiert huet, interpretéiert déi Haltung esou: Déi 12- bis 17-jähreg hunn e ganz komplex Bild vun der Manéier, wéi Politik funktionnéiert. Fir si ass de politesche System eppes extrem Friemes, eppes Komplizéiert, wat se mengen net meeschten ze kënnen, an dofir wëlle se sech do eraushalen.

Dofir gëtt dann och staark op déi politesch Bildung gepocht. Déi meescht Impulser fir e Jugendlechen, sech fir Politik ze interesséieren, kommen, den Emfreen no, aus de Familljen oder vu Frënn a Kollegen, mä net aus der Schoul.

Fir politesch Participatioun ze schafen, kann al-lerdëngs d'Schoul net eleng responsabel gemaach ginn. Et kann een d'Schoul net mat all nieiem Problem belaaschten. Vill aner Akteuren hunn och do eng Verantwortung. Ech denken do an éischter Linn un d'Elterrenhaus.

D'Parteien a besonnesch d'Jugendorganisa-tiounen vun de Parteien mussen sech ëm déi Jugendlech bekëmmern, an zwar net déi vun 30 bis 35 Joer. Neen, déi vu 15 bis 18 Joer! Si solle Seminären organiséieren, déi Jugendlech oppen an objektiv informéieren, se léieren, d'Problemer ze erkennen, d'Politik net als eppes héich Theoretisches ze gesinn, mä als eppes Konkretes, wat dat dagdeeglecht Liewe bestëmmt. Jugendlecher solle mat eelere Politiker zesummekommen a léieren ze diskutéieren a sech auszedrécken. Dofir huet d'Partei-finanzéierung Mëttele virgesinn. An och do sinn d'politesch Parteien gefuerdert.

Do huet d'Jugendparlament sécher och eng wichteg Roll ze spillen. Et gëtt nun eben och bei de Jugendleche politesch Käpp, déi aner

matzéie kënnen a matrappe kënnen. Esou kann een e Milieu schafen, wou méi passiver a méi ängschtlecher mat aktive Jugendlechen zesummekommen a matgerappt ginn.

Mä d'Schoul huet och eng Verantwortung. D'LSAP proposéiert, an den ënneschte Klassen am Secondaire ze investéieren, d'Biergerer-zéiung - Instruction civique - anzeféieren an d'politesch Participatioun an de Schoulen ze féieren. Aus enger Studie vun der Friedrich-Ebert-Stiftung vun 2013, „Politikunterricht im Fokus“, geet ervir, dass, wat een dat méi fréi an der Schoul mécht, wat ee méi fréi ufänkt mat der politescher Bildung, wat een doduerch eng besser Abannung vun de Jonke kritt. An dës Studie weist och, dass, wann dat net geschitt, besonnesch déi sozial Schwaach aus dem politesche Liewen ausgeschloss bleiwen. Raison de plus, fir et ze maachen, fir jiddweree mat an deen Effort do anzebannen.

Am augenblickleche Programm vun der Instruk-tion civique geet och iwwert d'Partei-rieds. Mä et hänkt vun den Enseignanten of, wat a wéi do iwwer Politik, Parteien, politesch Prozesser geschwat gëtt. Et ass net nozevoll-zéien, ob dat e frontale Cours mat Fakten an Informatiounen ass oder éischter e partizipative Cours. Et wär ze wënschen, dass d'Schoul léiert ze diskutéieren, Faiten ze sammeln an opze-schaffen, perséinlech Aarbechte fir den Astieg a politesch Problemer ze privilegiéieren.

Et ass sécher eng wichteg Diskussioun am Ze-summenhang mam Wahlalter, wéi d'Instruc-tion civique op d'Erzéiung vum Bierger an aller Objektivitéit an Toleranz weiterentwéckelt ka ginn a wat fir eng Roll den Enseignant dobäi ze spillen huet. Eng Roll, déi sécher net einfach ass an enger Matière, wou d'Meenunge sech gäre géintiwierstinn.

Här President, léif Kolleginnen, léif Kollegen, mat dësem Referendum geet d'Chamber nei Weeër an der partizipativer Demokratie an ei-sem Land. D'LSAP begrüsst dat ausdrécklech!

Et ass scho gesot ginn, mir hunn zu Lëtzebuerg am Fong keng Referendums-kultur. Dofir sinn déi véier Referenden, déi mer säit 1919 haten, ze vill ënnerschiddlech vläicht. 1919 goung et engersäits ëm d'Statsform, anersäits iwwert d'wirtschaftlech Ubannung u Frankräich oder d'Belsch. 1937 hu mer iwwer e Gesetz ofge-stëmmt, wat schonns vun der Chamber uge-holl war: d'Maulkuerfgesetz. An 2005 hu mer an zweeter Liesung iwwert den europäesche Vertrag ofgestëmmt.

Elo stëmmen mer de 7. Juni iwwer dräi Froen of. An déi Befragung ass konsultativ. Dobäi ka kee sech verstoppen an d'Partei mussen alleguer Faarf bekennen.

Wat d'sozialistesche Fraktioun ugeet, wäerte mir eis kloer un d'Resultat vun dësem Referendum halen. Mir wäerten de Wëlle vum Lëtzeburger Vollek respektéieren. Bei anere Partei schéngt dat net esou kloer ze sinn.

Mir hunn elo just héiere vum CSV-Sprieche - an och gelies haut am „Lëtzeburger Wort“ -, dass d'CSV sech géif fräihalen, fir d'Resultater vum Referendum ze interpretéieren, dass d'CSV sech géif virbehalen - an dat ass haut gesot gi vum Fraktiounscheef vun der CSV -, fir a Fonctioun vun der Proportioun vum Resultat, a Fonctioun vum Déroulement vum Débat sech ze ent-scheeden, wéi se sech géif verhele par rapport zu deem Resultat vun deem Referendum.

Ech mengen, d'Leit dobause sollen dat wës-sen. D'Leit solle wëssen, dass d'CSV, déi grouss Oppositionspartei, sech fräihält, fir de Wëlle vum Souverain à sa guise, no Kritären, déi si sech fräi festsetzt, ze interpretéieren a fir a Fonctioun dovunner dann ze décidéieren, wéi se sech verhält!

(**Protestations**)

► **M. Claude Wiseler (CSV).**- Dir misst awer vläicht nolauschten, wat genau gesot gëtt, anstatt emol einfach Saachen esou ze be-haapten! Lauschtet no...

► **M. Franz Fayot (LSAP).**- Am Endeffekt...

► **M. Claude Wiseler (CSV).**- ...oder liest et no!

► **M. Franz Fayot (LSAP).**- Am Endeffekt mam Resultat - wann dat dann esou ausgeet; kommt, mir ginn dovunner aus vläicht, dass op där enger oder anerer Fro d'Resultat knapps ass -, dass d'Minoritéit nun emol sech géif u sech duerchsetzen an dëser Diskussioun, dass elo emol de Wëlle vun der Minoritéit méi wich-teg wär wéi dee vun enger Majoritéit, souguer wa se ganz knapps ass. Ech mengen, dat muss een hei an aller Kloeerheet soen. An d'Leit do-bause sollen dat wëssen an dëser Diskussioun!

► **Une voix.**- Très bien!

► **M. Franz Fayot (LSAP).**- D'LSAP hofft, dass de Rendez-vous mat de Bierger an deenen nächste Méint e flotte Moment vun direkter, vu gelieferter Demokratie gëtt. Ech wënsche mer,

dass dësen Débat op eng konstruktiv Aart a Weis gefouert gëtt. An et ass un de Parteien, de Parteien hei an der Chamber, fir dësen Débat mat Liewen ze fëllen.

Den Alex Bodry huet vun enger „sachlecher a kontroverser Diskussioun“ geschwat. En huet sech gefrot, ob mer räif wären, fir dës Diskus-sioun op déi Aart a Weis ze féieren. An ech mengen, et gëtt effektiv en Test!

Ech muss soen, wann ech der CSV hir Attitüd hei gesinn an dëser Diskussioun an hir nawell virulent Aart a Weis, fir un dës Diskussioun erunzegoen, an, jo, ech muss soen, op eng obstruktiv Aart a Weis an net ouni mauvaise Foi - wéi se déi Froen auserneenhëlt, wéi hei alles, alles a Fro gestallt gëtt, wéi alles auserneege-pickt gëtt, wéi alles contestéiert gëtt, wou ee mat näischt d'accord ass, souguer net mam Prinzip...

► **M. Claude Wiseler (CSV).**- Wou mer nach ëmmer keng Antwort kruten!

► **M. Franz Fayot (LSAP).**- ...vun dësem Referendum! -, da gëtt et mer e bësse baang, muss ech soen!

An da muss ech mech froen, ob hei net au con-traire vun der Oppositioun eng politesch Ins-trumentaliséierung vun dësem Referendum ge-maach gëtt,...

(**Interruption**)

...ob net hei vun der Oppositioun justement probéiert gëtt, fir dës Referendum an eppes ëmzewandelen, wat en net ass, fir en ëmzewandelen an e Plebiszit, an eng Ofstëm-mung géint d'Regierung! Dat ass meng Angscht. An ech hoffen, dass dat eng onbe-grënt Angscht ass. Mä ech fäerten dat, wann ech déi Discoursen héieren.

Ech mengen och, dass, wa mer déi Diskussioun féieren, mer se musse féiere scho mam Bléck op deen zweete Referendum, deen 2017 wäert stattfannen ënnert dem Artikel 114 vun der Verfassung, well justement dës dräi Froen net lassgebonne si vun der globaler Reform vun der Verfassung. Si sinn net am loftleere Raum entstanen, contrairement zu deem, wat Verschiedener versichen, hei ze soen. Si sinn en Deel vun engem Ganzen. Et ass en Deel vun enger Verfas-sung fir Lëtzebuerg fir d'21. Jorhonnert!

A meng Fraktioun wäert sech ganz kloer dräimol mat Jo heizou prononcéieren. Mir wäerten alles maachen, dass dee Referendum gewonne gëtt.

Merci.

► **Plusieurs voix.**- Très bien!

► **M. Mars Di Bartolomeo, Président.**- Merci och dem Här Fayot. Nächsten ageschriwwene Riedner ass den Här Claude Adam.

► **M. Claude Adam (déi gréng).**- Här Pre-sident, léif Kolleginnen a Kollegen, ech wollt fir d'Eischt emol dem Rapporteur vun där Pro-position de loi Merci soen, dem Alex Bodry, fir säin ausféierleche schrëftlechen an nach méi ausféierleche mëndleche Rapport, deen a mengen Aen och näischt un Däitlechkeet ze vermësse gelooss huet an deen och fir mech ganz verständlech war.

Ech wëll och all deene Kollegen, déi viru mir geschwat hunn, Merci soe fir eng Rei ganz in-teressant Punkten, déi awer och hei an der Dis-kussioun opkomm sinn. An ech wëll zu gudder Lescht och der Madame Loschetter, menger Fraktiounscheffin, Merci soen, déi als Coauteu-rin vun där Proposition de loi kee Problem der-mat hat, datt ech als Member vun der Institu-tiounskommissioun fir déi gréng Fraktioun hei däréif Stellung huelen.

► **Mme Viviane Loschetter (déi gréng).**- Gär geschitt!

► **M. Claude Adam (déi gréng).**- Mir hu jo deen dankbare Modell 2, dee mer et erlaabt, och e bësselchen den Historique ze maachen, wéi mer zu där Diskussioun, déi mer haut féie-ren, iwwerhaupt komm sinn. An am Géigesaz zum Här Bodry an och zu enger Rei anere Vir-riedner wëll ech net op de Referendum agoen, mä eigentlech op d'Constitutioun, d'Constitu-tioun, déi mer hunn.

Déi éischt, déi mer kritt hunn, déi éischt demo-kratesch Verfassung, dat war den 9. Juli 1848. Mir haten deemools eng konservativ Re-gierung, déi hat d'Zensuswahlrecht bäibeha-len, mä déi liberal Fraktioun vun deemools konnt awer eng Verfassung nom belsche Virbild duerchsetzen. Lëtzebuerg ass eng konstitutio-nell Monarchie ginn. An de Prinzip vun der Souveränitéit vum Vollek war awer deemools nach net an der Verfassung festgehalen ginn.

Déi Verfassung ass och eng Zäit ausser Kraaft gesat ginn. An d'Constitutioun vum 17. Okto-



ber 1868, déi ass eigentlech haut nach en viqueur, och wann et natierlech am Laf vun der Zäit eng ganz Rei Ännerunge goufen. Déi Constitutioun vun 1868 war ronn 50 Joer guer net geännert ginn. 1990, also nom Éischte Weltkrich, kouw...

(Interruption)

1919! Hat ech net esou gesot, Här Meyers? Dann hat ech mech verschwat, entschëllegt!

1919 kouw et zu wichtege Ännerungen. Du war et erëm roueg ëm d'Verfassung, bis et nom Zweete Weltkrich, am Joer 1948, zu enger ganzer Rei wichtege Neierunge komm ass, well d'Demokratieverständnis sech weiderentwéckelt hat. An duerno sinn nach vill Ännerunge komm, op déi ech natierlech net all wëll agoen. Mä e puer ass et mer awer wichteg hei ze ernimmen.

Zum Beispill: Mat der Revisioun vum 29. Abrëll 1999 ass den Artikel 18 an eis Constitutioun komm. An do steet dran: «La peine de mort ne peut être établie.» Dat ass een Artikel, dee mir perséinlech ganz wichteg ass. An duerfir hunn ech mer och elo e Plesier gemaach, en nach eng Kéier hei ze zitieren, obschonn en eigentlech näischt mam Sujet weider ze dinn huet. Mä ech bréngen meng aner Beispiller awer, déi si ganz enk un de Sujet vun haut gebonnen.

An zwar wëll ech nach op d'Ännerung agoe vun 1972. Do hate mer den aktive Wahlalter vun 21 op 18 Joer erofgesat an de passive Wahlalter vu 25 op 21 Joer. An et huet och gedauert bis 2003, wou mer erëm eng Ännerung vun der Constitutioun gemaach hunn, wou dat passivt Wahlrecht och op 18 Joer fixéiert ginn ass.

Mir haten och, an dat ass dann déi lescht wichteg Revisioun vun der Constitutioun, déi ech wëll ernimmen, den 23. Oktober 2008 hate mer eng Rei Ännerunge vun der Constitutioun gemaach wat d'Nationalitéit vum „Lëtzeburger sinn“ oder „Lëtzeburger ginn“ betrëfft.

Am 21. Jorhonnert ass et du mat Ännerungen an engem ganz schnelle Rhythmus weergaangen. Mir haten Ännerungen 2000, 2003, 2004, 2005, 2006, 2007, 2008, 2009, an dunn ass et zu engem Avis vum Statsrot komm, dee gesot huet: „Majo, dat ass jo awer eigentlech net ganz seriö. Wier et net besser, Dir géift d'Verfassung eng Kéier ganz iwwerschaffen, anstatt datt Der permanent eenzel Artikelen ofännert?“

A well d'Chamber déi Meenung vum Statsrot gedeelt huet, ass den 21. Abrëll 2009 d'Proposition de révision 6030 vum honorabelen Här Paul-Henri Meyers déposiert ginn. Domat wollt d'Chamber évitéieren, datt et zu enger, ech zitieren, „banalisation des révisions constitutionnelles“ kéim.

D'Constitutioun ass dee wichtigsten Text, dee mer hunn. Dir wësst, datt mer eng Ännerung just kënne maachen, wa mer eng Zweedrüttel-majoritéit vun den Deputéierten hunn an datt et kee Vote par procuration gëtt. Den Text, deen an enger éischer Lektür votéiert ass, muss duerch en zweete Vote confirméiert ginn, an dat fréiestens no dräi Méint. Et sief dann, et géif een, ënnert den noutwendege Konditiounen, den Text engem Referendum ënnerzéien. Dat wier dann awer eng aner Zort Referendum wéi deen, vun deem mer haut schwätzen. Dee Referendum ass och ugekënnegt, mä net fir haut. Esou wäit si mer nach net.

Firwat soen ech dat alles? Majo, d'Institutionskommission vun der Chamber schafft mindestens zënter 2009 un enger Reform vun eiser Constitutioun. Do ass vill a gutt Aarbecht gemaach ginn. Et gëtt och probéiert, ëmmer no engem gréisstméigleche Konsens ze sichen. Wann een d'Aarbechtdokument kuckt - déi lescht Versioun vum Aarbechtdokument ass vum 10. November 2014 -, da stellt ee fest, datt ganz vill Ännerunge proposéiert ginn an datt dat alles an engem grouse Konsens geschitt ass, vläicht esouguer an der Unanimitéit.

An der Diskussioun losse sech vill Differenze léisen an op ee gemeinsamen Nenner bréngen, awer net allegueren. Déi Differenzen, déi sech net am Konsens léise loosse, ware bekannt. An dat hat d'Regierung derzou verleet, fir an hire Regierungsprogramm ze schreiwen, datt mer 2015 géifen d'Leit, d'Vollek ënner Form vu Referendum zu e puer essenziell wichtige Froe befreien.

An déi wichteg Froe waren: de Finanzement vun de Ministres des cultes - an et ass kloer, datt et déi Froe waren, well dat eben och aus der Verfassung kënnt; dat steet genau esou an der Verfassung - ech kommen nach dorop zrëck -, iwwert d'Droits politiques des citoyens non luxembourgeois, iwwert d'Bedelegung

vun deene Jonke vu 16 Joer un an iwwer eng Limitatioun vun der Zäit vun de Ministeren, vun der Mandatsdauer vun de Ministeren.

D'Diskussioun an der Institutionskommission stoung op. Déi Lénk hunn och eeg Propositione bruecht vu Referendumsfroen, interessant Propositionen, déi allerdéngs net aus de jorelaange Verfassungsdiskussionen an der Institutionskommission erausgaange sinn an duerfir och kee Konsens fonnt hunn.

De Referendum ass kee Selbstzweck, an des Regierung huet och net an hirem Programm stoen, fir an deser Legislaturperiod e Modell vun direkter Demokratie anzeféieren, wéi mer en zum Beispill aus der Schwäiz kennen. Mir wollten an der Fro vun der Reform vun eiser Verfassung weiderkommen, an duerfir wollte mer op Positionen, wou mer scho jorelaang campéieren, zu enger Décisioun kommen.

D'CSV an d'ADR fannen et keng gutt Iddi, fir e Referendum ze organiséieren, an hu sech net un der Diskussioun bedeelegt.

Op enger Pressekonferenz hat ech virun zéng Deeg ënner anerem gesot, an den Här Wiseler hat et och hei schonn ugefuert, datt et natierlech schued wier, datt d'CSV hire Memberen a Sympathisante géif recommandéieren, fir bei den dräi Referendumsfroen dräimol mat Neen ze stëmmen. Ech hunn och gesot, dat wier allerdéngs konsequent vun der CSV an duerfir och net weider verwonnerlech.

Schliisslech stinn déi Referendumsfroen jo am Zusammenhang mat der Revision vun der Verfassung, iwwert déi scho jorelaang diskutéiert gëtt. An eben op dese Punkte war keen Accord mat der CSV ze fannen.

Ech hat och gesot, wann d'CSV hire Sympathisante proposéiert hätt, dräimol mat Jo ze stëmmen, da wier dat engersäits super gewiescht. Dann hätte mer jo e politesche Konsens gehat. Anerersäits hätte mer e Problem, wat den ugekënnegte Referendum vum 7. Juni 2015 betrëfft, well dee bräichte mer jo dann net méi.

D'CSV hat schonn eng Kéier hir Meenung geännert. Si hat nom Accord vun der Regierung an de Reliounsgemeinschaften akzeptéiert, fir den Artikel 106 «Les traitements et pensions des ministres des cultes sont à charge de l'État et réglés par la loi.» aus der Constitutioun ze sträichen.

► **M. Claude Wiseler (CSV).** - Nodeems en Accord war mat der Kierch, wat mer vun Ufank u gesot haten, datt deen Accord sollt probéiert ginn ze kréien. Dat war och relativ konsequent.

(Interruptions)

► **Une voix.** - Très bien!

► **M. Claude Adam (déi gréng).** - Très bien! Ech huelen dat gären zur Kenntniss, Här Wiseler.

Nodeems Der laang net dermat d'accord waart, waart Der d'accord, fir den Artikel 106 aus der Constitutioun ze sträichen. Mir hunn doropshi gesot, majo, déi Referendumsfro, an et war genau déi, si war formuliert: „Sidd Dir mat der Iddi averstanen, datt de Stat net méi d'Verpflichtung huet, d'Paen an d'Pensiounen vun de Kultusdéngeer vun de Glawensgemeinschaften ze iwwerhuelen?“ Déi hat op eemol e grouse politesche Konsens fonnt. Dat hat zur Konsequenz, datt mer déi véiert Fro aus der Proposition de loi vum Referendum gestrach hunn.

Wann d'CSV och bei deenen dräi anere Froen hir Positioun geännert hätt, dann hätte mer eis logescherweis missen iwwerleeën, ob mer dann iwwerhaupt ee Referendum géife maachen.

Et gëtt vill Froen, zu deenen ee kann ee Referendum organiséieren, Här Wiseler. Dir hutt jo och gesot, Dir hätt der vill. Mä Dir hutt se awer och net an d'Diskussioun erabruucht. A mir hunn ëmmer kloer gesot, datt d'Absicht vun eis wär, ech hunn et scho virdru gesot, net fir an deser Legislatur op de Schwäizer Wee vun der direkter Demokratie ze goen, mä fir Kloeerheet ze kréien, wéi eng Richtung verschidde Punkten an eiser Verfassung solle kréien.

Déi dräi Froen, déi elo nach iwwreg bliwen, ginn allen dräi an d'Richtung vu méi Matbestëmmung. Méi Leit solle sech an der Politik abréngen. Méi Leit solle participéieren, sollen d'Méiglechkeet kréien, sech politesch ze engagéieren a responsabel ze handeln. Méi Leit solle sech kennen u politesche Wahlen als Wieler bedeelegen.

Déi dräi Froen, déi iwwreg bliwwe sinn, an do deelen ech d'Astellung vum Här Bodry, déi erfellen eigentlech déi dräi Kritären effektiv. Si si verfassungsrelevant. Si si kontrovers. Awer och erëm net esou kontrovers, datt schonn eng Majoritéit do wär. A si sinn och, wat d'Antwort betrëfft, onmëssverständlech. Do kann d'Institutionskommission weiderschaffen, wa mer d'Antworten vum Vollek op déi dräi Froen hunn.

Déi éischt Fro: „Sidd Der averstane mat der Iddi, datt d'Lëtzeburger, déi tëschent 16 an

18 Joer al sinn, d'Recht kréien, sech fakultativ an d'Wielerlëschten anzeschreiwen, fir als Wieler bei de Wahlen fir d'Chamber, d'Europaparlament an de Gemengerot souwéi bei Referende matzemaachen?“ déi gréng hu scho laang an hirem Wahlprogramm stoen, datt mir fir d'Wahlrecht vu Jonker vu 16 Joer u sinn. Mir wëssen, datt dat ëmstridden ass. Net nëmmen a konservative Kreesser, souguer bei enger Rei Jonker selwer.

Meeschtens leeft d'Diskussioun drop eraus, datt déi Eeler, an zum Deel och déi Jonk selwer, jonke Leit mat 16 oder 17 Joer keen oder kaum ee politescht Uerteel zoutrauen. Si mengen, déi Jonk hätte keen Interessi un der Politik, géife sech licht beaflosse loosse, hätte keng Ahnung vu Politik.

Deem setze mir entgéint, datt et och vill Leit iwwer 18 Joer gëtt, déi keen Interessi un der Politik hunn, déi sech licht beaflosse loosse an deenen hiert politescht Uerteel net reng op Fakten berout.

Et gëtt och nach heiansdo argumentéiert, datt d'Wahlrecht misst un d'Groussjähregkeet gekoppelt sinn. Do gëtt d'Bild vun engem Jonke vermëttelt, dee viru sengem 18. Gebuertsdag méiglechst näischt dierf, a vun deem Dag un, wou en da seng 18 kritt, op eemol all Diere soll opgemaach kréien. Dat ass e Bild vum Mënsch, dat mir net deelen.

Fir eis ass erwuesse ginn e Prozess, eng Entwécklung, déi Schrëtt fir Schrëtt virugeet. A mir hunn där Schrëtt schonn e puer gemaach. Zum Beispill Auto fueren, ass jo wichteg och bei eis am Land, Conduite accompagnée dierf ee scho mat 17 maachen. D'Schoufflicht geet bis 16 an net bis 18. Mir mudde Jonken zou, schaffen ze goen, Steieren ze bezuelen, awer wielen dierfe se net goen.

Eist Strofrecht mécht natierlech, an zu Recht, en Ennerscheid tëschent engem Mineur an engem Majeur, mä och ee Jugendleche vu 16 oder 17 ka vum Jugendrichter un e Strofgerecht verweise ginn.

Mir erwaarden eis, datt déi Jonk an d'Schoule sech méi wäerte fir d'Politik interesséieren, wa Jonker kënne viele goen. Mir sinn der Meenung, datt e Gewinn fir eis alleguer ass, wa mer deene Jonken d'Méiglechkeet ginn, sech méi fréi politesch ze engagéieren an ze responsabiliséieren.

Bei de Chamberswahlen 2013 ware ronn 240.000 Wieler ageschriwwen. Ech weess net genee, wéi vill Jonker mer zu Lëtzebuerg hunn, déi tëschent 16 a 17 Joer al sinn. Ech weess awer, datt ee Joergang zu Lëtzebuerg eng ronn 5.000 Leit duerstellt. Dat si graff déi Zuelen, déi sech aus de Schoulstatistiken erausliese loosse. Da schwätze mer hei vun engem Potenzial vu ronn 10.000 zusätzleche jonke Wieler, an dovun sinn der vill Netlëtzeburger. An d'Aschreiw vum deene Jonken ass jo och nach fräiwëlleg.

D'Wielerpotenzial gëtt also net gewaltig an d'Luucht gesat. déi gréng sinn der Meenung, datt et eise Land an eiser Politik guttdeet, wa mer déi Jonk encouragéieren, sech fir Politik, also fir d'Gestaltung vun deem Land, an deem si méi laang nach wäerte liewe wéi mir allegueren heibannen, fir si derfir ze interesséieren.

déi gréng sinn der Meenung, datt bei eis den Undeel vun de Wieler, déi net méi am aktiven Aarbechtsprozess sinn, verhältnisméisseg grouss ass. Eng Verjüngung vun der Wieler-schaft ass an eisen Aen eng richtig Décisioun. D'Leit ginn ëmmer méi al haut, dat huet nach de Mëtteg eis Familljeminiestesch gesot, dat ass och gutt esou. Mä mir fannen et awer och wichteg, datt mer duerfir eng Verjüngung kréien, datt déi Jonk och kënne viele goen.

Mir wäerten eis drëm beméien, bei villen Diskussiounen, bei Ronndeschgesprécher, Versammlung mat de Medien, déi eis zur Disposition stinn, méiglechst vill Mënsche fir de Jo zu deser éischer Referendumsfro ze iwwerzeegen an ze begeeschteren. Et geet, wuel bemierkt, hei just ëm dat aktiivt Wahlrecht. Et ass net gefrot an och net virgesinn, den Alter fir dat passivt Wahlrecht erofzesetzen.

Et geet hei och just ëm Lëtzeburger Wieler. Dat ass fir kloer des Fro vun der zweeter Fro ze trennen, fir datt mer déi Froen och kennen onofhängeg vunene weiderverschaffen an eisen Aarbechte vun der Reform vun der Constitutioun.

Ech kommen dann zu der zweeter Fro: „Sidd Dir mat der Iddi averstanen, datt d'auslännesch Matbierger d'Recht kréien, sech fakultativ an d'Wielerlëschten anzeschreiwen, fir als Wieler bei Chamberswahle matzemaachen, an dat ënnert der besonnescher duebeler Bedéngung, datt se op d'mannst während zéng Joer zu Lëtzebuerg gewunnt hunn a virdru scho bei Gemengen- oder Europawahlen zu Lëtzebuerg matgemaach hunn?“

Den 1. Januar 2014 hu ronn 550.000 Leit zu Lëtzebuerg gewunnt. Mir wëssen, datt dovun praktesch 45% Netlëtzeburger sinn. A mir wëssen och, datt déi Tendenzen weider wäert klammen.

An der Stad Lëtzebuerg hunn den 31. Dezember 2014 107.340 Leit gewunnt. Dovun waren 69% Netlëtzeburger. D'Stater Buergermeeschtesch ka vu sech soen, si wier Buergermeeschtesch vun enger Stad, wou ee groussen Deel vun de Bierger d'Méiglechkeet huet, si ze wielen. Well mer an der Stad wéi eben an all Lëtzeburger Gemeng d'Méiglechkeet hunn, datt d'Netlëtzeburger och kënne viele goen. Datt se net genuch dovunner profitéieren, ech mengen, datt hu mer an der Politik och als wichtige Sujet erkannt. Mä d'Méiglechkeet besteet, an dat ass jo ëmmerhin den éischte Schratt, fir och méi Participatioun ze kréien.

Bei de Chamberswahle geet dat net. An eiser aktueller Constitutioun steet: «Pour être électeur, il faut:», éischte Punkt, «1° être Luxembourgeois ou Luxembourgeoise; (...).» Mir wëllen, wann d'Majoritéit vun de Bierger mat Jo stëmmt bei der Fro, eng kleng a bescheiden Ouverture maache fir déi vill Netlëtzeburger, déi bei eis wunnen a schaffen, déi bei eis akafe ginn, Steiere bezuelen, deenen hir Kanner bei eis an d'Schoul ginn an déi hir Fräizäit bei eis verbréngen, eng Ouverture, se ënner gewësse Konditiounen och u Chamberswahlen deelhuele ze loosse.

Ech nennen et eng kleng a bescheiden Ouverture. Et si Konditiounen gesat: zéng Joer am Land wunnen a schonn zumindest un enger Wahl deelgeholl hunn. An da geet et hei och nëmmen ëm dat aktiivt Wahlrecht. Dat passivt Wahlrecht bleift de Lëtzeburger virbehalen.

Dat si Konditiounen, déi méi Leit ausschléisse wéi se zu de Wahlen zouloossen. déi gréng wieren och gär bereet, déi Ouverture e bësse méi grouss ze maachen. Mir stinn awer selbstverständlech zu deem Kompromëss, dee mer fonnt hunn. An och wann ech gesot hunn, et ass eng kleng a bescheiden Ouverture, dann ass et awer eng wichteg a symbolträchteg. Mir mengen, datt et richtig ass, déi Ouverture ze maachen.

D'Virstellung, mir géifen eng Kéier hei setzen an däitlech manner ewéi d'Halschent vun de Leit, déi hei wunnen, hätten nëmme méi d'Recht, fir eis ze wielen, dat ass fir eis keng schéi Virstellung. Mir sinn der Meenung, datt et wichteg ass, deen Débat zu Lëtzebuerg ze féieren, wou mer stinn a wou mer hiwëllen. Mir sinn der Meenung, datt, wa mer méi politesch Participatioun wëllen, da muss mer méi Leit et ermeiglechen, Zougang zu de Wahlen ze kréien.

An ech soen och hei ausdrécklech dem Franz Fayot Merci fir seng interessant Bemierkungen, déi e gemaach huet, wat et heescht, Bierger an enger heiteger Gesellschaft ze sinn. Dat ass e flotten Argumentaire, Här Fayot. Ech hoffen, Dir erlaabt mer, datt ech och nach wäert dorop zrëckgräifen, wa mer an der Diskussioun do-bausse mat Argumenter nach weider fir déi Iddi hei antrieden.

D'CSV mengt, de Wee zu méi Participatioun misst iwwert d'Nationalitéitgesetz goen. Ech si frou iwwert déi Ouverture. An den Här Wiseler kléngt 2014 esou wéi den Här Braz 2008 geklongen huet.

► **Mme Viviane Loschetter (déi gréng).** - Jo! Jo!

► **M. Claude Adam (déi gréng).** - Residenzzäit méi kuerz, Sproocheklausel net esou streng. Mir freeën eis op déi Diskussioun. A wann den Här Wiseler och virdru gemengt huet, en huet e bësse gedroht, wa mer elo hei aus der Constitutioun eraushuelen, datt een net méi muss Lëtzeburger sinn, a mer hunn elo nach hei Konditiounen, mä da maache mer d'Dier op, wie weess, vläicht kënnt nach eng Kéier, huelt emol déi Zäit vun der Residenzdauer, gi mer vun zéng op aacht Joer erof, oder op fënnf.

Här Wiseler, dat ass denkbar. Ech mengen net, datt mer hei stoe bleiwen, mä alles zu senger Zäit. An, Här Wiseler, Dir sidd jo och net stoe bliwven. Dir hutt lech jo an der Nationalitéitfro hei immens beweegt. An dat ass jo flott. Et ass och flott, wann Dir, zwar mat engem gewëssene Retard, awer och mat der Zäit matgitt.

► **Plusieurs voix.** - Très bien!

► **M. Claude Adam (déi gréng).** - Mir mengen awer, datt dat eng Diskussioun ass, wat d'Nationalitéitgesetz betrëfft, déi eng aner ass wéi iwwert d'politesch Participatioun. Et gëtt gutt Grënn, den Zougang zu der Lëtzeburger Nationalitéit net onnéideg schwéier ze maachen. Et gëtt gutt Grënn, fir d'Participatioun zu de Chamberswahlen e bësse méi einfach ze maachen. Déi Grënn iwwerschneide sech, jo, mä si sinn net identesch.

A wann Der just wëllt iwwert d'duebel Nationalitéit fueren, Här Wiseler, da muss een, an och den Här Berger huet dat scho gesot, da



muss een awer trotzdem der CSV soen, datt Der eng ganz Rei Leit diskriminiéiert, déi aus Länner kommen, déi keng duebel Nationalitéit kennen. Ech hunn un Eisträich an u Spuenien geduecht. Den Här Berger huet och nach Holland, Dänemark a Polen ernimmt. Dat wier jo och zweeërlee Mooss, dat mer da géife mat deene Leit maachen, déi bei eis am Land wunnen.

► **Une voix.** - Et sinn och souverän Staten, déi décidéiere fir sech.

► **Une autre voix.** - Dat ass net eise Problem.

► **M. Mars Di Bartolomeo, Président.** - Loosst lech net ofenken, Här Adam!

► **M. Claude Adam (déi gréng).** - Mir wäerten eis derfir asetzen, fir méiglechst vill Leit dovun ze iwwerzeegen, datt mir Lëtzebuurger net méi aarm ginn, wa mer e Stéck vun eise Wahlprivilegien un eis net Lëtzebuurger Résidenten ofginn, mä am Géigendeel, datt dat fir all Awunner hei am Land e Gewënn wäert sinn.

Déi drëtt Fro: „Sidd Dir mat der Iddi averstannen, d’Zäit, während där eng Persoun ouni Ënnerbriechung Member vun der Regierung däerf sinn, op maximal zéng Joer ze begrenzen?“

Dës Fro ass och verfassungsrelevant, well se d’Rechter vun eenzelne Mënschen aschränkt. Et geet hei net ëm de Cumul vu Mandater. Do wiere mir Gréng ganz wäit matgaangen, mä iergendwéi schéngt nach keen esou richtig wëlle mat eis an déi Richtung ze goen. An et ass och kloer: Esou e Wee kann een net eleng goen. Dat ass schonn eng gemeinsam Décisioun, déi d’ganz politesch Klass muss droen.

Hei geet et ganz einfach ëm d’Fro, ob een no zéng Joer Regierungsaarbecht soll eng Paus maachen oder net. Mir sinn der Meinung: Dach, et soll een eng Paus maachen.

Déi Paus ka gären an der Chamber gemaach ginn. Et ass ëmmer erëm schéin ze erliewen, wéi e fréiere Minister ganz engagéiert en Dossier verteidegt, deen hien nach aus senger fréierer Regierungszäit kennt. Mir sinn och der Meinung, datt et genuch talentéiert Leit am Land gëtt, datt mer kee mussen éiweg halen, well et ouni hien net géif goen. De Kierfecht läit voller Leit, déi gemengt hunn, et géif net ouni si goen. An och Politiker sinn, ënnert dem Stréch, stierflech.

► **Plusieurs voix.** - Très bien!

► **M. Claude Adam (déi gréng).** - Mir sinn der Meinung, datt mer keng Ministere brauchen, déi Erfahrung hunn, fir jorelaang Problemer auszesetzen! Do schénge mer dann eng aner Meinung ze hu wéi déi gréisst Oppositionspartei.

Den honorabele Marc Spautz hat op der CSV-Pressekonferenz gemengt, seng Partei wier géint d’Beschränkung vun der Mandatzäit vun engem Regierungsmember. Et wier jo de Wieler, deen engem géif den Optrag ginn, an d’Regierung ze goen, an duerfir sollt een dem Wieler dat net ewechhuelen. Dobäi weess den Här Spautz ganz genee, wéi mir och alleguer, datt de Wieler d’Leit an d’Chamber wielt, datt e gutt Wahlresultat sécherlech hëlleft, Chancen op e Regierungsposten ze kréien, mä datt dat awer keng Selbstverständlechkeet ass.

Dës Regierung - a bal all Regierung virdrun - huet Leit an d’Regierungsequipe opgeholl, déi net extra gutt gewielt waren, an och Leit, déi guer net u Wahlen deelgeholl hunn.

Mir huelen och, an dat ass mer awer och extrem wichteg, mir huelen de Leit näscht ewech! Ech weess net, Här Wiseler, wéi Der kennt soen, mir wëilten de Leit eppes ewechhuelen. Mir verbidden hinnen och näscht. Mir stellen eng Fro! Mir stellen eng Fro a mir hunn och allegueren erkläert, datt mer eis wëllen un déi majoritär Antwort halen. Wann d’Leit majoritär soen: „Dat ass eng gutt Iddi. Mir sinn och fir de Renouveau, datt e bësselche Bewegung kennt!“, dann akzeptéiere mer dat. A wann d’Leit do mat Nee stëmmen, da soe mir: „D’Leit wollten dat net.“ Da respektéiere mer dat och.

Et ass scho gesot ginn: Wien däerf wile goe bei dësem Referendum? Nëmme Lëtzebuurger. Mir hu keng aner gesetzlech Basis.

Mir hunn och am Virfeld eng Zesummenaarbecht mat der Uni Lëtzebuerg gehat. Déi Viraarbecht, déi Zesummenaarbecht ass net gekënnegt an och net ofgeschloss. Et muss een allerdéngs och kloer an dältlech soen, datt d’Uni Lëtzebuerg eis ka wëssenschaftlech begleeten, awer net eis politesch Aarbecht ka maachen. Eis politesch Aarbecht, déi mussen mir nach ëmmer selwer maachen.

Et ass och ugekënnegt ginn, datt no deem heite Referendum weider un der Constitutioun geschafft géif ginn. An da steet en nächste Referendum - an dat gëtt dann en aneren, mat bindendem Charakter - iwwert déi ganz Verfassung am Raum. Dat gëtt nach e spannende Moment, mä do si mer nach net derbäi.

Op alle Fall, ech hoffen, et ass kloer a mengen Ausféierunge ginn: déi gréng wäerte sech asetzen, fir méiglechst vill Leit ze begeeschten an ze iwwerzeegen, bei den dräi Referendumsfroen mat Jo ze stëmmen.

Ech soen lech Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Adam. Nächste Riedner ass den Här Roy Reding. Dir hutt d’Wuert, Här Reding.

► **M. Roy Reding (ADR).** - Merci, Här President. Dir Dammen an Dir Härren, léif Kollegen, ech wollt dem Franz Fayot besonnesch Merci soe fir seng interessant Ried, wou ech zwar mat kaum eppes d’accord sinn, mä dorüwwer kréie mer nach interessant Diskussiounen. E sot: „Mir hu keng Referendumskultur.“ Ech gi méi wäit an ech soen: Mir hunn heibanne keng Verfassungskultur!

Generatiounen vun Deputéierte kommen heihinner virun dëst Pult a schwieren en Eed, d’Verfassung ze respektéieren. A Generatiounen vun Deputéierten hu Gesetzer gestëmmt, déi duerno vun eiser Cour constitutionnelle als net verfassungskonform festgestallt goufen! A wat war déi traureg Reaktioun dorobber, ganz oft, net ëmmer? Hu mer d’Gesetz geännert? Neen, mir hunn d’Verfassung geännert!

Dat ass e bësselchen deen Tenor, deen ech och hei gesinn, well och hei gëtt nees e Gesetz gestëmmt, wat net verfassungskonform ass a mengen Aen. Eng Verfassungsännerung ass keng lichter Saach. Kéint een eng Verfassung jee no politescher Majoritéit all fënnf Joer änneren, mä da wier et jo keng Verfassung! Da wier et eppes wéi e Gesetz.

D’Verfassung, ass hei gesot ginn, beinhaltet d’Grondrechter vun de Bierger, d’Grondregele vum Fonctionnement vum Stäit a vu sengen Institutionen. An den Här Adam huet mer e ganz besonnesche Pleséier gemaach, wéi en den Artikel 18 zitéiert huet: «La peine de mort ne peut être établie.» Wat wier esou en Artikel wäert, Här Adam, wa 50,01% vun der Bevëlkerung e kéinten änneren? E steet ebe just an der Verfassung, fir datt net 50,01% vun der Bevëlkerung oder vun den Deputéierten heibannen e kënnen änneren, mä zwéi Drëttel, an dat si 66,66%!

Eng Verfassung mécht also absolutt kee Sënn, kee Sënn, wa se ka mat enger klenger Majoritéit geännert ginn! A genau duerfir gesäit eis Verfassung, wéi iwwregens praktesch all Verfassung vun der Welt, spezifesch Regele vir, wéi se ka geännert ginn. Déi Regele si ganz, ganz kloer. Den 19. Dezember 2003 hunn heibannen 59 Deputéiert vu fënnf Parteien, also bis op d’Ausnahm vun engem eenzegem Deputéierten d’Deputéiert hei allegueren, den Artikel 114 geännert. Virdrun huet d’Chamber missen opgeléist ginn, fir datt d’Verfassung konnt geännert ginn. Dat gouf ofgeschafft.

A säit deem Dag seet eis Verfassung am Artikel 114, wéi se ka geännert ginn: «Toute révision de la Constitution doit être adoptée dans les mêmes termes par la Chambre des Députés en deux votes successifs», an zwar avec «au moins les deux tiers des suffrages des membres de la Chambre, les votes par procuration n’étant pas admis.» Esou kann d’Verfassung geännert ginn, an nëmmen esou kann d’Verfassung geännert ginn!

Wann Dir e Sondage wëllt maachen, wat d’Leit denken, maacht e Sondage! Mä nennt en net en «référendum constitutif», well et ass kee Référendum constitutif!

► **Plusieurs voix.** - Consultatif!

► **M. Roy Reding (ADR).** - Neen, neen, neen! Consultatif ass e souwéisoen nëmmen. Neen, „constitutif“ huet den Här Professor Dokter Heuschling vun der Uni Lëtzebuerg dee Referendum genannt, deen Der hei maacht.

Et gëtt eng Majoritéit constitutionnelle. An déi Majoritéit constitutionnelle, Här Bodry, datt ass net eng kleng Majoritéit! Dat ass och net de Wëlle vum Vollek mëssuecht, wann ee seet, eng Majoritéit constitutionnelle si 66,6%!

(**Interruption**)

Déiselwecht gréng, rout a blo Parteien, déi den Artikel 114 hei matgestëmmt hunn, wéi déi Verfassung ka geännert ginn, genau déi...

(**Interruption**)

...setze sech elo iwwert déi Verfassung hei ewech a wëllen eis hei, well se genau wëssen, datt net zwéi Drëttel vun den Deputéierte mat hire Positiounen d’accord sinn, iwwert dës Referendum eppes ënnerjubelen!

Här Bodry, Dir däerft mer eng Fro stellen.

► **M. Alex Bodry (LSAP).** - Éischtens, et muss eng Präzisioun sinn, dass de Professor Heuschling awer ni a Fro gestallt huet, dass e Referendum zu deenen dote Froe kéint hei zu Lëtzebuerg stattfannen. An e fënnit och, dass déi Froen an de Referendum u sech verfassungskonform sinn. Nëmme fir dat kloerzestellen!

► **M. Roy Reding (ADR).** - Jo,...

► **M. Alex Bodry (LSAP).** - Déi zweet Fro ass - do ass en also net Arer Meinung -, déi zweet Fro ass: Wann Der sot, fir d’Verfassung géif nëmmen zielen eng Zweedrëttelmajoritéit, wéi sou ass et da méiglech, dass am Artikel 114 steet, dass den zweete Vote vun der Chamber ersat gëtt duerch e Referendum? An do geet eng einfach Majoritéit duer.

► **M. Roy Reding (ADR).** - Jo, Merci, Här Bodry. Genau dat doten: Eng einfach Majoritéit geet duer, nodeem heibannen eng Majoritéit constitutionnelle vu 66,66% war! An alles aneschtens si Wënkelaaffekotstricken,...

(**Exclamations**)

► **M. Alex Bodry (LSAP).** - Dir sidd gutt placéiert! Dir sidd gutt placéiert, fir dat ze jugéieren!

► **M. Roy Reding (ADR).** - Alles aneschtens si Wënkelaaffekotstricken, fir d’Verfassung, fir den Artikel 114 vun der Verfassung, deen Dir selwer gestëmmt hutt, ze ëmgoen! D’Verfassung, Dir violéiert d’Verfassung! D’Verfassung ass bei lech kee Fascht wäert!

(**Interruption**)

Dës Referendum ass kee Référendum constitutif, et ass e Gimmick, et ass e Gadget, et ass e Sondage! Mä dee Sondage, an ech si frou, datt mer hei an den Oppositionsparteien do enger Meinung sinn, mir loosse eis do...

(**Interruptions**)

...net virun Är Kar spanen. An à moins, datt eng Majoritéit constitutionnelle do wier, dat géife mer dann emol gesinn,...

(**Interruptions**)

...hale mir eis als ADR un eise Wahlprogramm!

D’Doppelzüngegkeet, wat d’Referenden ugeet... Här Bausch, Dir grinst grad esou schéin! Här President, däerf ech dem Här Bausch soen: Wéi mir heibannen den Tramreferendum gefrot hunn, sot den Här Angel, ech zitéieren en elo net wuertwäertlech: „Doriwwer gouf et schonn e Referendum, an dat waren d’Wahlen! Dir als ADR waart déi eenzeg Partei, déi géint den Tram war. Dir krut nëmme 7%. Also sinn 93% vun der Bevëlkerung fir den Tram. Also brauche mer kee Referendum.“

(**Interruption**)

Ma mat deemselwechten Argument soen ech lech: Och d’Wahlrecht fir Ausländer stoung an de Programme vun de Parteien. An heibannen ass eng Majoritéit, eng „constitutif“ Majoritéit, déi ganz kloer an hire Wahlprogrammen hat, datt se net fir dee Wahlprogramm (veuillez lire: fir dat Wahlrecht) war! Also brauche mer kee Referendum, well mir wëssen, datt mer keng Majoritéit constitutionnelle hunn heibannen...

(**Interruption**)

...heibannen hu fir eng Ofännerung vun der Verfassung, wat d’Wahlrecht fir Ausländer ugeet.

(**Interruptions diverses**)

Déiselwecht Doppelzüngegkeet hate mer net nëmme beim Tramreferendum, mir hunn och e Referendum proposéiert iwwert d’Bestietnis vun den Homosexuellen! Ass dat net eng gesellschaftlech Fro, wou een hätt kënnen d’Bierger froen? An dat war e Gesetz! An do, jo!, do wier och eng kleng Majoritéit, 50,01, déi wier och do determinant gewiescht.

Also nach eng Kéier, ganz kloer: Den eenzege Référendum constitutionnel, deen et gëtt, dat ass deen zweete Referendum nom Vote hei an der Chamber. Deen ass vun der Verfassung virgesinn, an do stëmmen d’Bierger jo och of iwwer e ganz prezisen Text, iwwer genau deen Text, dee mer hei festhalen! Net den Artikel xy, mä den Artikel 1, den Artikel 2, den Artikel 3 an esou weider. An natierlech ass dee Vote decisiv! An natierlech, wa méi wéi 50% vun der Bevëlkerung, also vun de Wieler deen Text géifen oflehnen, dann ass e vum Dësch.

Zur Opportunitéit vun de Froen ass hei scho vill gesot ginn. Et ass scho gutt gelaacht ginn. Net zu Onrecht huet den Här Wiseler op genau déi Punkten higewisen, déi mir u sech och doranner deelen. Ech freeë mech jiddefalls drop, wann déi Fro zum Beispill iwwert déi zéng Joer Ministeschäit géif mat enger Majoritéit beluecht ginn, op dem Här Asselborn seng Demissioun den 8. Juni, fir d’Konsequenz ze zéien aus dem Vollek sengem Wëllen.

Mä firwat goufen déi dote Froen erausgewielt a keng aner? Et ass virgehäit ginn, mir als Opposition hätte keng Propositionen gemaach. An do soen ech och datselwecht wéi de Fraktiounschef vun der CSV: Mir hu keng Propositionen gemaach, well mer géint de Prinzip selwer vun deem Referendum sinn, well mer dee Prinzip selwer fir anticonstitutionnel halen.

Mä wa mer awer elo aginn an engem Débat op déi Froen, déi een hätt kënnen oder hätt solle stellen: Kommt, mir schwätze vum Artikel 1! Am Artikel 1 schwätze mer haut vun eisem Land als dem „Grand-Duché de Luxembourg“. Dir wëllt

dat änneren an an Zukunft soll Lëtzebuerg „Luxembourg“ heeschen. Et deet mer leed, datt den Etienne Schneider net méi hei ass, soss hätte mer iwwer Nation Branding kënne schwätzen: Wéi vill Diere mécht dat eis op an der Welt, well mir deen eenzege Grand-Duché sinn op der Welt?! Ass dat net en Atout, dee mer hunn? A wier net e Changement de nom eppes gewiescht, wou mer d’Vollek hätte kënne froen?

De Statschef: Bis elo hu mer e Grand-Duc. An der neier Verfassung, wéi Dir se proposéiert, schwätze mer nach just vun engem „Chef de l’État“. Et ass en germe d’Ofschafen oder déi potenziell Ofschafung vun der Monarchie. Firwat hutt Der déi Fro net gestallt? D’Kollege vun der Partei vun déi Lénk hunn dat proposéiert. Firwat ass déi net gestallt ginn?

Firwat stellt Der keng Fro iwwert de Wahlsystem? Et wier jo eng interessant Fro, fir ze wëssen, firwat datt zum Beispill eis Wieler am Osten, déi eis mat 8,7% gewielt hunn, heibannen absolutt net vertruede sinn! Ass dat direkt Demokratie? Ass dat Är partizipativ Demokratie, déi Der gären hätt?

Also ganz kloer, fir eis ass dat doten e Gimmick, e Gadget. Mir wäerten eise Wieler proposéieren, eise Kongress proposéieren, datt en eise Wieler proposéiert, datt se dräimol mat Nee stëmme bei deenen dote Froen. A fir de Rescht freeë mer eis op eng ganz interessant an hoffentlech och heiansdo hëtzeg Debatt.

Ech soen lech Merci.

► **Une voix.** - Très bien!

► **M. Mars Di Bartolomeo, Président.** - Merci och dem Här Reding. Leschten ageschriwwene Riedner ass den Här Serge Urbany.

► **M. Serge Urbany (déi Lénk).** - Merci, Här President. Wann ech de Reding esou..., den Här Reding, pardon!

(**Hilarité générale**)

► **Une voix.** - Dir waart elo richtig lancéiert!

► **M. Serge Urbany (déi Lénk).** - Pardon, et war e Lapsus, et war net...

(**Interruption**)

Wann ech den Här Reding esou hei héieren, da mengen ech bal, mir wieren amgaang, eng total Illegalitéit hei ze maachen. Dobäi ass de Referendum eppes, wat an der Verfassung virgeschriwwen ass!

► **Une voix.** - Très bien!

► **M. Serge Urbany (déi Lénk).** - A mir sinn eis driwwer eens...

(**Interruption par M. Gast Gibéryen**)

A mir sinn eis driwwer eens, dass en eng konsultativ Wierkung huet bei der Verfassungsännerung, wou selbstverständlech all Partei - och d’ADR! - hir Verantwortung muss iwwerhuele vis-à-vis vun deem,...

(**Interruption par M. Roy Reding**)

...wat d’Majoritéit vum Vollek wäert esou oder esou soen. An dee ganzen Zirkus, deen hei opgefouert gëtt, mat „Gimmick“, angeblechem Gimmick an esou weider, dat ass jo just e Gimmick, fir vun der Verantwortung vun der ADR ofzelenken, déi sech wäert stellen nom Referendum! Ganz kloer!

(**Interruptions**)

Wéi se sech och wäert stellen...

(**Interruption par M. Gast Gibéryen**)

...vun all Partei. Wéi se sech wäert stelle vun all Partei heibannen!

(**Interruptions diverses**)

► **Une voix.** - D’Décisioun ass elo schonn do, virum Referendum!

► **M. Serge Urbany (déi Lénk).** - Här President, déi Referendumsdiskussioun hei ergëtt sech jo aus deenen ongeléiste Froen aus der Verfassungsdiskussioun, an zwar deene Froen, op deenen et keng Zweedrëttelmajoritéit gëtt. Do si mer eis eens. Mir mengen awer, dass aner Froe fir eis an och fir vill Leit dobausse gradesou wichteg wieren.

A mir hunn - am Géigesaz zur CSV - iwwregens déi Froen agereecht an d’Kommissioun, während d’CSV hei seet, si hätt hir Froen net agereecht, déi se hei opgezielt huet, well se de Referendum net wollt legitiméieren. Si wollt also de Referendum delegitiméieren hei, andeem se keng Froen agereecht huet, déi jo hirer Meinung no esou wichteg sinn.

► **Une voix.** - Très bien!

► **M. Serge Urbany (déi Lénk).** - Ech wëll also op dräi Froekomplexer hei agoen, déi eiser Meinung no hätte misse behandelt ginn.



Éischte Froekomplex: Wéi sinn d'sozial Rechter an der neier Verfassung formuléiert? Si se staark formuléiert? A sinn et Rechter, déi och aklobar sinn? A kann de Stat am Artikel 1 vun der Verfassung nëmmen als „demokratesch“ definéiert ginn, an net och ausdrécklech als „sozial“ definéiert ginn? Mir haten dat als Referendumsfro formuléiert. Et ass ofgelehnt ginn. Mir hunn och konkret Ännerungsvirschlei an der Verfassung an déi Richtung gemaach. Déi sinn och allegueren ofgelehnt ginn, iwwregens vun alle Parteien, déi ausser eiser an der Verfassungskommissioun sinn.

Deen zweete Froekomplex: Wéi ass et grad an dësen Zäiten, wou et ëmmer méi Detailer gëtt iwwer Internet- an Dateniwwerwaachung, wat do reell geschitt, wéi ass et do mat dem perséinleche Recht op Dateschutz, mat der sougenannter „informationeller Selbstbestimmung“? Dat heescht, och mam Recht, fir selwer kënnen mat ze decidéieren, wat mat sengen Date geschitt, am Kader vun engem Gesetz natierlech.

Dat war eng weider zousätzlech Fro, déi mer wollten am Referendum stellen. Déi ass och ofgelehnt ginn. Allerdéngs ass do d'Diskussioun nach net fäerdeg, wat d'Formuléierungen am Verfassungstext selwer ugeet. Do ginn d'Diskussionen och an der Verfassungskommissioun weider an do wäerte mer och weider eng konstruktiv Roll dobäi spillen.

Drëtte Froekomplex, an dat ass fir eis e ganz wichtegen: Ass et net un der Zäit, bal 100 Joer nom leschte Referendum vun 1919 iwwert d'Monarchie, dass d'Leit erëm gefrot ginn, ob se d'accord sinn, dass an den Artikel 2 vun deem neie Verfassungstext, deen an der Ausaarbechtung ass, soll stoe kommen, dass d'parlamentaresch Demokratie zu Lëtzebuerg d'Form vun enger konstitutioneller Monarchie soll unhuelen?

Ech wëll hei betounen, dass e ganzt Kapitel vum neie Verfassungsentwurf - an dat soll virun dat stoe kommen iwwert d'Chamber - der Familjeregung vum Grand-Duc consacréiert soll ginn. Dat, wat ee fréier „Fürstenrecht“ genannt huet, gëtt also Deel vun der Verfassung, also Froe vu Filiatioun - eigentlech sinn dat jo biologesch Froen, wann ech dat richtig verstane hunn - vum Statschef a vu sengen Nofolger. Déi biologesch Froe stinn elo an engem Grondtext iwwer Demokratie, iwwert d'Regelung vun der Demokratie hei am Land!

Mir fannen dat e bëssen eng komesch Situatioun. A mir fannen och, dass een d'Leit dorüwer hätt kënnen froen, besonnesch well jo gesot gëtt, dat wier ee vun de wichtegen Aspekter, d'Neuierdung an der Verfassung vun der Relatioun vis-à-vis vum Grand-Duc.

A wann d'Leit dann déi Fro vun der konstitutioneller Monarchie mat jo beäntwert hätten, dann hätt sech fir eis och als zweet Fro gestallt: Wat sollen dann d'Rechter vun deem Monarch sinn? Soll en zum Beispill weiderhi kënnen Gesetz eleng a sengem Numm erloossen? – „Promulguer!“ - Solle kënnen all Uerteeler a sengem Numm ausgefouert ginn? Sollen all Traitée vun him ënnerschriwwen ginn an all Statsbeamte vun him agestellt ginn, wéinstens formell? Esou ass et virgesinn! Oder soll de Grand-Duc net eng reng symbolesch Roll kréien, wéi a Schweden zum Beispill?

Ech mengen och nach, dass sech dohannert aner Froe verstoppe wéi déi vun de Relatiounen tëschent der Regierung, déi jo eigentlech de Grand-Duc vertritt an der Realitéit, vis-à-vis vun der Chamber. Mä ech hu keng Zäit, dorobber anzegoen.

Mir mengen awer, dass d'Fro vun der Statsform eng vun deene wichtege Froen ass, déi sech an dëser Verfassungsfro stellt. A wann dat keng „konstitutiv“ Fro ass oder eng konstitutionell Fro ass - fir et richtig ze soen -, da froen ech mech, wat esou eng Fro ass.

Leider hu mer et net fäerdegbruecht, fir eng Referendumsfro dozou duerchzekréien, déi mer awer formuléiert haten.

Prinzipiell menge mer zu där ganzer Verfassungsdiskussioun, dass, wa mer eng nei Verfassung maachen, dat ëmmer och eng Richtungsdebatt an der Gesellschaft viraussetzt. Wat ass de Sënn vun enger neier Verfassung, wa se keng nei Weeër opmécht? A wann ee wëllt nei Weeër goen, da muss een och zesummen an am Virfeld mat de Leit iwwert déi Weeër diskutieren, se och zum Deel zesumme mat de Leit ausschaffen.

Wéi zum Beispill an Island et sech gewisen huet, wou eng Verfassung op enger breeder Basis, an engem breede konsultativen, participative Prozess mat de Leit ausdiskutiert ginn ass. Mir hu vun deem Modell vill geschwat. Mir

hunn en awer ni esou ëmgemat, mat enger klenger Ausnahm, dat ass déi Debatt, déi mer elo wëlle féieren iwwer Internet, wou Leit kënnen Froen eraschécken zur Verfassung, wou se kënnen Formulierung selwer zur Verfassung eraginn.

Mir gesinn och, wéi den Här Fayot, d'Verfassung éischter als e Grondvertrag tëschent de Bierger an net als e Grondvertrag tëschent de Parteien hei an der Chamber. Duerfir menge mer och, dass d'Haltung, déi hei d'CSV prinzipiell, net am Detail vun de Froen, ageholl huet, dass dat eng falsch ass, wa se der Majoritéit reprochéiert, de verfassungsméissege Konsens hei an der Chamber violéiert ze hunn, andeem se déi Froen do dem Vollek wëllt stellen, dass dat am Fong geholl e Mépris ass vun der Participatioun vum Vollek, un der Ausaarbechtung vun den demokratesche Regeln a vun der gronddemokratescher Regelung, an ëm déi geet et jo hei bei der Verfassung.

Mir ënnerstëtzen duerfir och d'Décisioun vun de Regierungsparteien, dee Referendum hei ofzehalen. Mir fannen, dass dat eng richtig Décisioun ass.

Doriwwer eraus si mer der Meenung, dass och aner Froen, ech hunn et scho gesot, sollen diskutiert ginn, dass muss d'Debatt och iwwert déi gesamt Verfassung méi an der Effentlechkeet elo Fouss faassen. An ech hoffen och, dass dat wäert de Fall sinn an där Internetdiskussioun. Mir selwer hu beschloss zum Beispill, en alternativen Text vun enger Verfassung als déi Lénk auszuschaffen an och där breeder Diskussioun do ze ënnerwerfen.

Wat déi virleidend Froen elo ugeet, esou ënnerstëtze mer hir Richtung och grondsätzlech. A mir hunn et schonn e puermol gesot, dass mer recommandéieren, mat jo ze äntwerten op all Fro, déi gestallt ass. Am léifsten hätt mer jo recommandéiert, véiermol mat jo ze äntwerten.

Leider huet d'Majoritéit de Referendum ëm eng véiert Fro amputéiert. Eise Virschlag, fir déi Fro vun der Laizitéit a vun der Trennung vu Kierch a Stat ëmzeformuléieren an och esou kloer de Leit beim Referendum ze stellen, ass leider net ugeholl ginn, en ass vun alle Parteien an der Kommissioun ofgelehnt ginn. Ech wëll awer betounen, dass d'ADR net an där Kommissioun vertritt ass.

De Problem bleift och nach, dass DP, LSAP a Gréng sech eens gi si mat der CSV, fir en Text an d'Verfassung ze schreiwen, en eegent Kapitel an d'Verfassung ze schreiwen, wat heescht: „Des relations entre l'État et les communautés religieuses“. Mir fannen, dass d'Kierchen do extra ervirgehuewe ginn an institutionell an d'Verfassung agebonne ginn. Ënner Trennung vu Kierch a Stat stelle mir eis eppes anescht vir. Virun allem ass awer erëm eng Geleeënheet verpasst ginn, fir an der Effentlechkeet de Prinzip vun der Laizitéit breet ze diskutieren.

A Wierklechkeet sinn also véier Froen eis ofgelehnt ginn, wann een déi nach derbäirechent vun der Laizitéit. Mir hunn eis duerfir och beim Rapport enthalten. Mir hunn eis nëmmen enthalten an net dergéint gestëmmt, well mer prinzipiell mat der Ausrichtung vun deenen dräi verbleiwende Froen d'accord sinn, obscho mer och do a verschiddenen Detailformulatiounen aner Virstellungen hunn.

Éischtens, d'Fro vum Awunnerwahlrecht. Mir touchéieren do natierlech de Fong vun der Demokratie. Honnert Joer no der Verallgemengung vum Wahlrecht 1919 op d'Leit alleguer an och op d'Fraen, hu mer haut erëm de Problem, dass bal d'Halschecht vun den Awunner kee Wahlrecht huet.

Et si scho vill Argumenter hei gebraucht ginn, déi ech allegueren deelen, fir d'Afféierung vun deem Wahlrecht. Een Argument schéngt eis awer wesentlech ze sinn. An dat ass dat, dass d'Salariéen aus dem Privatsecteur an hirer Majoritéit keng Lëtzeburger Nationalitéit an also och kee Wahlrecht hunn. A mir fillen eis do zum Deel erëm zréck an d'Zäite versat vum Zensuswahlrecht am 19. Jorhonnert vis-à-vis vun engem Deel vun deene Leit, déi schaffe ginn. En Deel vun de Saliéien huet zu Lëtzebuerg kee Wahlrecht. Dat muss ee ganz kloer esou soen.

Dat ass och en Aspekt vun de wuessende sozialen Ongläichheeten, déi et gëtt an alle Länner. E Politolog vun Tréier huet haut am „Lëtzeburger Wort“ eng richtig Bemierkung dozou gemaach, dass am Fong geholl déi wuessend sozial Ongläichheeten e wichtegt Element vun der Demokratie sinn, wéi d'Demokratie soll ausgesinn. A mir mengen, dass dozou och d'Wahlrecht eng wichteg Roll misst spillen.

Et héiert een hei heiansdo, wéi wichteg et wier fir d'Integratioun, fir dass d'Leit Lëtzeburger géife ginn. An ech muss soen, déi Remarquë kommen deelweis vun deeneselwechte Leit, déi ëmmer zum Beispill géint d'duebel Nationalitéit waren. D'ADR zum Beispill war ëmmer géint

d'duebel Nationalitéit. Mir hunn dat elo zwar net vum Här Reding héieren, mä mir hunn et bei anere Geleeënheeten héieren, dass d'Nationalitéit soll un d'Wahlrecht gebonne sinn.

Déi Remarquë kommen och vu Leit, déi ëmmer de Fouss op der Brems haten, wann et ëm d'Ausweitung vun der Nationalitéit gaangen ass. Ënnert dem Här Frieden vun der CSV sinn et Réckschrëtter gi virun e puer Joer, wat d'Nationalitéitgesetz ugeet. An den Historiker Denis Scuto huet an deem Kontext vun Nationalpopulismus an Ethnisierung vun der Debatt ëm d'Nationalisierung geschwat.

Dat ass ausgaange vun der CSV deemools. Duerfir wonnerech ech mech, dass elo op eemol e Projet de loi hei déposéiert gëtt, deen nach verbessert ass par rapport zum Här Biltgen sengem. An ech mengen, dass déi konservativ Droite scho laang mat hirer Retizienz, déi se huet, fir den Ausländer d'Nationalitéit ze ginn, den Débat iwwert d'Wahlrecht nom Awunnerprinzip eigentlech richtig opgemaach huet.

An deen Débat ass net méi zréckzedréien. En ass net méi zréckzedréien, well geschwé 50% vun den Awunner d'Nationalitéit net hunn. En ass net méi ëmzedréien, well d'Bewosstsäin och an Europa gewuess ass, dass d'Wahlrecht a ville Fäll net méi un d'Nationalitéit gebonnen ass. Wann ech als Europäer an en anert Land wunne ginn, och nëmme fir kuerz Zäit, dann hunn ech do d'Wahlrecht, och vice versa.

(Interruption)

Ech schwätze jo net vun de Chamberswahlen.

► Plusieurs voix.- Aah!

► **M. Serge Urbany (déi Lénk).**- Dann hunn ech d'Wahlrecht... Majo, dann hunn ech d'Wahlrecht bei Gemengewahlen, dann hunn ech d'Wahlrecht bei den Europawahlen. Dat ass awer schonn e wesentlechen Aschnëtt...

(Interruption)

...an de Prinzip, dass e Wahlrecht nëmmen un d'Nationalitéit ka gebonne ginn. A selbstverständlech huet den Ausländer hei déiselwecht Rechter. Mir hunn awer och laang versicht, him se ze verwieren, dat muss een awer och derbäisoen.

(Interruption)

Da kommen ech zum Wahlrecht fir déi Jonk. Déi Debatt ass jo am Ausland scho laang lancéiert. Et ginn och do positiv, mengen ech, Experienzen. An ech mengen, dass grad an dëser Zäit, wou sech grouss Froen an der Gesellschaft stellen, wou déi Jonk deelweis méi schlecht Perspektiven hu wéi hir Elteren, wéi se deeselwechten Alter haten, wou sech weltwäit Froe vu Friden a Krich stellen, méi akut wéi virun, menge mir, dass déi Jonk déi sinn, déi am meeschten an am längsten d'Konsequenze mussen droen vun enger falscher Politik, déi haut kann decidéiert ginn.

Mir mengen duerfir, dass se och sollen un där Politikausschaffung bedeelegt ginn. An et gëtt absolutt keng Ursaach, fir dervun auszegoen, dass ee Jonken, dee mat 16 Joer ka schaffen goen, net déi intellektuell Fäegkeeten oder déi sozial Kompetenzen hätt, fir kënnen op d'mannst dat aktivt Wahlrecht auszeüben a wielen ze goen.

Zur Begrenzung dann nach, zum Schluss, vun der Ministerzäit. Et geet och hei ëm eng demokratesch Fro. A mir mengen, dass et enger Demokratie net gutt geet, wann ëmmer déiselwecht Persounen op deeneselwechte Poste setzen. Dat ass och schonn e bëssen e monarchistesche Prinzip. Och Parteie ginn iwwregens ofhängeg dovunner, wéi vun enger Drog, wéi ech soen. An ech mengen, d'CSV weess, vu wat ech schwätze.

(Interruption)

Iwwregens setzt dee Prinzip vun enger Mandatsbegrenzung jo och virus, dass no enger Paus déiselwecht Leit erëm kënnen hir Talenter als Minister an den Déngscht vun der Allgemengheet stellen, wann d'Allgemengheet dat nach ëmmer wëllt. Iwwregens ass dee Prinzip eis jo och sympathesch, well en eng gewëssen Analogie huet mam Rotationsprinzip, deen déi Lénk a gewielte Gremie praktizéiert. Mir praktizéieren en, well en ausser enger Mandatsbegrenzung och nach de Virdeel huet vun enger Erneuerung an Erweiterung vun de politesche Mandatairen.

Aus all deene Grënn an trotz deene Kritiken, déi ech am Ufank gemaach hunn un der Virgoensweis vun der Regierung, wäerten déi Lénk dee Gesetzesprojet hei stëmmen, well e fir d'Éischt zënter Laangem erëm eng Befroung vun der Bevëlkerung, allerdéngs, wat mer e bësse bedauern, net vun der auslännescher Bevëlkerung, mä nëmme vun der Lëtzeburger Bevëlkerung virgesäit. An dat och nach zu e puer Froen, déi mer als wichteg empfinden, och wa mir der Meenung sinn, et wieren nach aner Froen ginn, déi een hätt kënnen stellen.

Ech soen lech Merci. Mir stëmmen also fir dat Gesetz hei.

► Plusieurs voix.- Très bien!

► **M. Mars Di Bartolomeo, Président.**- Merci och dem Här Urbany. An d'Wuert huet elo d'Regierung, den Här Statsminister.

Prise de position du Gouvernement

► **M. Xavier Bettel, Premier Ministre, Ministre d'État.**- Här President, Dir Dammen an Dir Hären, ech wëll den Intervenanté Merci soen, dem Rapporteur virun allem, deen och e ganz komplette Rapport gemaach huet.

Här President, erlaabt mer, dass ech fir d'Éischt op e Wuert zréckkommen, wat oft vun deem engen oder vun deem anere gebraucht ginn ass vu Wahlbedeelegung an op där anerer Säit vu Politikverdrossenheet. Dat eent huet mat deem aneren eppes ze dinn. Well wann de Wieler all fënnef Joer eng Méiglechkeet huet, fir seng Stëmm ofzeginn, ass en och frou, wann en d'Méiglechkeet kritt, bei wichtige Froen, wéi eng Orientatioun vun engem Land, mat-schwätzen ze kënnen.

Hei si Froen, déi déi eng an engem Parteiprogramm haten, déi aner net, a wou eng Koalitioun sech fonnt huet, déi gesot huet: Kommt, dat heite si Froen, wou mer der Meenung sinn, dass mer de Bierger solle froen.

De Bierger, ech ginn elo net op d'Zuelen an, wéi vill Prozent dat mussen sinn. Mä de Message muss kloer si fir de Bierger, dass, wa kloer eng Majoritéit - 50,01% ass och eng Majoritéit - eng Décisioun hëlt, mir op jidde Fall, an ech schwätze vun den dräi Majoritéitsparteien, dat respektéieren. Dans les deux sens! Wa 50,01% vun de Leit Nee soen, da solle mer net duerch iergenden Trick probéieren, dann awer déi Texter iergendwéi, op iergendeng Manéier ze proposéieren ze änneren. Dat ass e Respekt vun enger Demande, déi de Bierger da kann trancheieren, ob hien der Meenung ass oder net.

Hei si Beispiller geholl gi vu Referendumen, déi am Ausland scho gestallt gi sinn. Ech wëll just soen, dass Frankräich och eng representativ Demokratie ass. An de Fraktiounschef vun där gréisster Oppositionspartei huet eng Zuel vu Referendumen opgezielt, och mam Intitulé. An ech muss awer och soen, dass zum Beispill eng Fro, ob de President vu siwen op fënnef Joer d'Mandat erofgestallt soll kréien, fir mech op d'mannst - op d'mannst! -, wann ech hei vun enger Bedeelegung vun engem groussen Deel vun der Populatioun froen, op d'mannst esou wichteg, wann net méi wichteg ass, wéi einfach ze froen, ob d'Leit averstane sinn, dass ee vu siwen op fënnef Joer erfoegte. An dat an engem Land, wou och eng Représentation démocratique op jidde Fall ass. An duerfir sinn ech och der Meenung, dass ee keng Angscht soll hu virun engem Referendum.

Mir kréien hei virgeworf als Koalitioun, dass ee just sech op véier Froen limitéiert hätt. Ech wëll just erënneren, dass am Koalitiounsaccord „notamment“ steet. „Notamment“ heescht, dass dat keng aner Froen ausschléisst. Haut kréie mer reprochéiert, dass, well ee géint e Prinzip vum Referendum ass, da keng Froe stellt. Dat ass fir mech, muss ech lech soen, Här President, keng kohärent Äntwert.

Well et zielt een eis duerno, firwat et keng véier Bezierker ginn, firwat d'Zuel vun den Deputéierten net gestallt gëtt, firwat d'Aufgabe vum Conseil d'État net diskutéiert ginn, firwat net de Fonctionnement vun der Justiz, d'Aufgabe vun de Gemengen, et cetera an et cetera, als Beispill geholl ginn. Mä dann hätt déi Partei, wann déi Froe jo esou wichteg sinn, d'Méiglechkeet gehat, déi Froen ze stellen, wann déi fundamental wichtig si fir d'Orientierung vun eisem Land.

An duerfir bleiwen ech, Här President, bei der Meenung, dass et schued ass, dass keng aner Froen och erakomm si vun deene grousses Majoritéitsparteien (veuillez lire: Oppositionsparteien), déi eis haut de Virwurf maachen, dass se géint de Prinzip wäeren. Jo, déi Lénk hu Propositione gemaach, déi keng Majoritéit fonnt hunn. Mä vun deenen zwou aneren Oppositionsparteien hu mer keng Propositione gemaach kritt. Duerfir fannen ech et haut e bësse schued, dass een da seet: Jo, mir si géint de Prinzip.

Wat ass de Prinzip vun engem Referendum?

(Interruption)

De Prinzip vun engem Referendum ass, dass d'Traditioun vum Referendum, kréien ech da gesot, zu Lëtzebuerg net do wier. Et si vill Saachen, déi zu Lëtzebuerg net do sinn. An ech kann lech et soen, Här President, dass dat Éischt, wat ech ëmmer am Ministère gesot kritt hunn, war: „Här Bettel, et wor awer ëmmer esou.“

(Hilarité)

Wann dat Politik ass, dass ee seet, „et wor ëmmer esou, duerfir dierf sech näischt änneren“,



dann ass dat heiten net déi richtig Koalitioun! Jo, well dës Koalitioun sech engagéiert huet, dëst Land och ze moderniséieren. An d'Moder-niséierung heescht och Participatioun vum Bierger bei Décisiounen. An hei dann ze soen, mir ginn an Otage geholl, an dann duerno mussen d'Leit fir eis décidéieren. Se hunn eis awer e Mandat ginn a mir sinn Deputéierten.

Hei si Froen, wou mer eis soen: Wéi e Lëtze-buerg wëlle mer muer?

An erlaabt mer kuerz, dass ech op déi dräi Froen - ech wollt am Ufank net op déi dräi Froen agoen, well haut wor fir mech de But jo, de Vote ze huelen, an dann, dass d'Campagne sollt ufänken, dass dann all Partei d'Méiglechkeet huet, an hirer Campagne ze soen, firwat se fir de Jo oder firwat se fir den Neen ass. Mä well jiddwereen zu deene Froe Positioun geholl huet, erlaabt mer, dass ech kuerz awer erklären, firwat een der Meenung ass als Regierung, dass et awer wichteg ass. Well et Méiglechkeete ginn.

An ech si perséinlech der Meenung, Här Pre-sident, dass eng Chamber, eng Regierung, e po-litische System do ass, fir engem Bierger Fakul-téiten ze ginn. Engem d'Méiglechkeet ze ginn, dat heescht, dass en d'Recht kritt, eppes ze maachen. An net mir décidéieren, ob e Rechter soll hunn oder net, wann et Saache sinn, wou een individuell kann eng Entscheedung huelen.

Et géllt keng Wahlpflicht fir déi tëschent 16 an 18 Joer, et gétt eng Wahlméiglechkeet. Mir soe jo net... An ech zitëieren hei och de President vun der CSJ, deen och seet, dass se fir den Droit de vote vun 18 op 16 Joer erof ass. Ech muss lech éierlech gesot soen, dass ech vis-à-vis vun der ADRenalin - wa se nach esou heescht - a vis-à-vis vun der CSJ, wou jonk Leit sech engagéieren, fir Politik ze maachen, wou se Loscht hunn, fir sech fir eng aner Gesellschaft ze engagéieren, oder op jidde Fall fir déi Positiounen, un déi se gleewen, sech wëllen engagéieren, gesot kréien: Jo, mä mat 16 Joer hutt Der nach net déi Capa-citéiten, déi Kompetenzen, dat Wëssen, fir kën-nen ze wielen. Dat fannen ech traureg.

Ech wäert op jidde Fall an enger anerer Quali-téit, als President vun enger vun de Majori-téitsparteien, déi Proposition de loi, déi och den Deputéierten Eugène Berger gemaach huet, ënnerstëtzen. An déi Positioun, déi och de Marc Zanussi virdru geholl huet an eng Rëtsch vun Deputéierte scho geholl hunn, ën-nerstëtzen, well ech mer einfach soen, dass mer hei jo de Leit eng Fakultéit ginn.

Et muss keen! Deen, deen net wëllt, muss net goen. Mä deen, dee wëllt, deen, dee wëllt un der Demokratie deelhuele, deen, dee wëllt mat décidéiere kënne, fannen ech et schued, wann ee géif duerno soen: Jee, mir sinn der Meenung, deen ass net amstand, dat ze maachen.

A ganz vill vun lech heibannen hu selwer och a Jugendmouvementer ugefaangen. A wa se da géife gesot kréien, jo, mä, da misst ee sech d'Fro stellen, firwat een iwwerhaupt scho mat 16 Joer an ee Jugendmouvemement kéint kommen. Well da kéint ee jo och soen, ab 18 Joer kanns de jo eréischt mat décidéieren, da misst de eréischt 18 Joer al sinn, fir kënne matzemaachen.

An ech muss lech perséinlech soen, dass ech et do schued fannen - just als Erklärung, firwat mer als Koalitioun och der Meenung sinn, dass et wichteg ass -, engem eppes ze verbidden.

Da bei der Fro vum Auslännerwahlrecht. Ech nennen et net méi Auslännerwahlrecht. Ech kann et net méi héieren, dass déi ganzen Zäit vun „Auslännerwahlrecht“ geschwat gétt.

(Interruption)

Et ass en Awunnerwahlrecht, Här President. Et ass de Fait, dass een an engem Land wunnt. Et ass e Fait, dass een an engem Land Racinnen huet. Mä et gétt e risegen Ennerscheed, an hei gétt deen net gemaach, tëschent enger Natu-ralisatioun an engem e Recht ze ginn.

Dat eent ass eng Démarche, wou ech soen, a verschiddene Länner muss ech souguer meng Nationalitéit opginn, fir kënne déi Lëtzebuergesch ze huelen, fir da vun deem Recht och ze profitéieren, dat déi Nationalitéit mer bréngt.

An hei ass en anere Prinzip, andeem ee seet, wann s du eng Rëtsch vu Konditiounen erfëlls - a se sinn zimlech streng: Et muss een zéng Joer hei wunnen, et muss ee schonn eemol matge-maach hu bei Wahlen -, dass een dann d'Méiglechkeet kritt, kënne ze soen: Okay, ech wier awer interesséiert, ech bezeue meng Stei-eren hei, ech participéieren zum Wuel vun deem Land, ech deele mäi Liewen hei, ech liewen hei, firwat kéint ech net d'Méiglechkeet kréien, fir kënne nieft där Participatioun, déi ech all Dag maachen, och eng Participation politique ze hunn, all fënnef Joer, fir kënne bei de Wahle matzemaachen?

Ech wëll just soen, dass mer och als Land jo scho méi wäit ginn, wéi ganz vill aner Länner. Bei de Gemengewahle kann och scho jiddweree mat-maachen. A bei den Europawahlen, bei Maas-tricht. Ech wëll net un den Débat, Här President,

vun deemools erënneren, wéi d'Leit Angscht ge-maach kritt hu bei Maastricht, wat dann elo op se duerkéim, wien nach Buergermeeschter a Schäffen an de Gemenge kéint bleiwen, mat där Invasioun, déi mer elo géife kréien. Ech wëll just drun erënneren. Dat ass net geschitt.

An am Fong, hei imposéiere mer och kengem eppes. An et ass net, fir dann iergendengem eppes ewechzehuelen. Hei gétt jo gemaach, wéi wann een en Awunnerrecht géif schafen an am Fong deem aneren, deen elo d'Wahlrecht huet, eppes géif ewechhuelen. Dat ass och falsch, Här President, well am Fong maache mer do eng Fa-kultéit, fir dass deen, deen - ech soen et nach eng Kéier - eng Rëtsch vu Joren hei gelieft huet, och Rechter ka kréien.

An ech muss lech soen, dass ech da gesot kréien: Mir mussen d'Naturalisatioungesetzer änneren. Also wann d'Katarina Witt haut Cham-ber TV gekuckt huet, wäert se ganz neidesch sinn iwwer der CSV hir Pirouetten. Dat wor im-pressionnant, Här President.

(Exclamations)

Ech ka mech erënneren... Jo, mä d'Katarina Witt huet ganz vill Pirouettë gemaach, Ma-dame Arendt - Madame Arendt, ganz vill Pi-rouetten! -, an iwwert déi vun Ärer Partei haut, déi als progressistesche Partei gären aus dëser Chamber erausgeet, déi déi ass, déi seet: „Deen Délai ass ze laang an déi Konditioune sinn ze streng.“

Ech wor deemools als Deputéierten hei am Haus, wou d'CSV bei all Measure, déi komm ass, gesot huet: Et geet net wäit genuch, et muss méi streng sinn, et muss méi selektiv sinn, et muss méi schweier sinn, mir mussen de Krunn zoudréien. Ech ka mech ganz gutt drun erën-neren! An haut awer d'Bild ze ginn: Mir sinn déi, déi der Meenung sinn, et muss alles anescht ge-maach ginn.

Tant mieux, wann haut dat d'Positioun vun der CSV ass! An deemools, muss ech soen, Här Wi-seler, hat Der och net déi Roll, déi Der haut hutt an Ärer Partei. An ech si frou, wann Der dann d'Leit, op jidde Fall, an déi Richtung kritt hutt.

An nach eng Kéier: Erlaabt mer, Här President, déi jonk chrëschtlech-sozial Jugend ze zitëieren. Déi soe selwer: «La finalité du droit de vote pour étrangers, c'est la réduction d'un déficit démocratique qui ne cesse de croître.»

► Une voix.- Très bien!

► **M. Xavier Bettel**, *Premier Ministre, Ministre d'État*.- Ech kann dat mat zwou Hänn ënner-schreiwen!

An d'CSJ huet vollkomme recht, Här President, wa se hirer Mammapartei seet: „Jo, mir sollen dat dote maachen, well mir woren deemools schonn, 2007, als CSJ Membres fondateurs de la plate-forme «refresh democracy!».“ Dat heescht, et kënnt net, et muss een net mengen, dass et e konservativen an net konser-vative Bord gétt.

Ech wëll och hei drun erënneren, dass den LCGB op sengem Kongress eestëmmeg fir d'Auslännerwahlrecht, also fir d'Awunnerwahl-recht gestëmmt huet. Eestëmmeg!

Ech wëll drun erënneren, dass een da ganz oft jo mengt, dass een da muss déi méi Konser-vativ oder alles, wat dann éischer reliéis wier, dass do eppes dergéint wier. De Bëschof och huet en Appell gemaach, dass ee soll dat hei-ten ënnerstëtzen.

Dat rassuréiert vläicht elo net déi Lénk.

(Hilarité)

Mä ech wëll elo just awer soen, Här President, dass een hei net soll maachen, wéi wann et e méi konservative Bord géif ginn an e manner konservative Bord géif ginn. Hei geet et just drëms, d'Fro ze stellen, a wéi eng Richtung mer wëlle goen.

An ech hoffen, wéi gesot, d'Regierung, all Par-tei huet duerno hir Verantwortung ze iwwer-huelen. Dir wësst jo, dass dat heiten och kee Sondage ass. Well hei ass vu Sondagé geschwat ginn, wéi d'Leit deen een oder deen anere gutt fannen. Hei geet et drëms, dass de Bierger d'Méiglechkeet emol eng Kéier kritt an der Ge-schicht, ze soen: Jo, ech hätt gären, dass d'Land an dës Richtung geet, oder ech hätt gä-ren d'Land an déi aner Richtung. Dat ass säi Choix.

An da kommen déi zéng Joer fir Minister. Et mengt een, et wier eppes Neies. Et gétt et schonn an anere Länner. Et gétt vill driwwer diskutéiert. Ech fänken elo net un, ze zitëieren, wat da bei deem enge gesot gétt, dass et duerno éischer eng Monarchie bis gétt. Dat heescht, dass e Premier bal eng Monarchie ass, e Monarch ass. An dann, dass een op eng Kéier d'Distanz net méi hält vis-à-vis vu senger Aar-becht, mä dann ze vill Distanz hält, et cetera. Et gi ganz vill Argumenter.

Hei geet et just drëms, dass een der Meenung ass, no zéng Joer ass et wichteg, och e Chan-gement ze hunn. Ass et wichteg, och e Chan-

gement ze hunn. Ech sinn elo net den Affekot vum Här Wilmes heibannen, dee sech jo freeë géif, wann déi Measure séier a Kraaft géif trie-den, wa seng Partei nees an d'Regierung géif kommen. Mä hei geet et drëms, dass een ein-fach an enger Demokratie och Changementer brauch.

Virdrun ass hei gesot ginn: „Jo, et hänkt of, wéi séier ee schafft.“ Mir hu verschidde Ministeren, déi woren 30 Joer an enger Regierung zu Lët-zebuerg. 30 Joer!

(Interruption)

Jo, si si gewielt ginn! Si sinn demokratesch gewielt ginn als Deputéierten, wëll ech nach eng Kéier soen, net als Minister, mä als Depu-téierte gewielt ginn. An, ech mengen, no 30 Joer, also, wann ech... Ech hunn dëse Weekend mat engem Minister giess, e Premierminister am Ausland, an dunn hunn ech em gesot: „Weess de, mir hunn elo e Referendum zu Lët-zebuerg, do ass e Maximum vun zéng Joer an der Regierung.“ Du sot deen: „Bei eis, mengen ech, ass nach ni een, deen d'Halschent vun där Zäit gepackt huet!“

(Hilarité et interruption)

Dowéinst ass et, et ass kee Beispill, Här Pre-sident, fir elo ze soen, wéi laang et bei deem engen oder wéi laang et bei deem anere geet. Mä et ass...

(Interruption)

An erlaabt mer am Fong nach eng Kéier deen Artikel, deen d'CSJ zitëiert, hei nach eng Kéier ze zitëieren, Här President, well et geet hei ëm „refresh democracy!“. Dat heescht, d'Demo-kratie erfërchen. An ech si perséinlech der Meenung, Här President, dass deen heite Refe-rendum eng Méiglechkeet ass. An ech si frou, dass och eng Majoritéit fir dee Schrëtt awer ass, dass mer iwwerhaupt d'Leit kënne froen. Well déi Leit, déi haut Nee soen, sinn der Mee-nung, dass een iwwerhaupt d'Leit net soll froen.

Do sinn ech der Meenung, dass een awer éischtens sech soll freeën, dass mer déi Refe-rendumsfroen stellen. An et soll net en „one-shot“ sinn. Firwat net och an enger nächster Koalitioun sech soen, do sinn och nach Punk-ten. Et muss ee jo net d'Gefill hunn, dass, well et elo gemaach gétt, et ni méi soll kommen. Mir brauchen elo net all sechs Méint wielen ze goen. Mä firwat net och an enger nächster Koalitioun sech nees verschidde Froen stellen, wou ee sech seet: Firwat soll een do och net e Referendum organiséieren?

Här President, et geet ëm eng nei Constitu-tioun fir eist Land. Et ass e grouesse Moment fir Lëtzebuerg. Domat gétt d'Zesummeliewen am Fong vun eise Land nei definéiert. An et ass d'Geleeënheet, fir d'Fundamenter ze géisse vun enger moderner an zukunftsorientierter Gesellschaft.

Mir wëllen dat zesumme maachen. Mir wëllen dat zesumme mat de Parteien, mat der Regie-rung, mam Parlament maachen, an do soll den Débat och an der Éffentlechkeet stattfannen. A mir sollen dës Punkten och maache mat en-gem Opdrag vum Vollek. Och dat, Här Presi-dent, ass den Ufank vun engem Émdenken hei zu Lëtzebuerg.

Et ass richtig an et ass och wichteg, dass et an engem Land kritesch Stëmme ginn zu dëse Froen, déi am Kader vum Referendum gestallt ginn. Mir froen net, dass 100% vun de Leit mam Kapp wénken a soen, Dir hutt recht. Mir brauchen d'Diskussioun an der Éffentlechkeet iwwer wat eist Zesummeliewe fir d'Zukunft och bestëmmt.

D'Regierung ass och ugetruede fir méi Demo-kratie bei den Décisiounsprozesser an am Dia-log mam Bierger. A mir gesinn dat, mir hunn dat gesinn, wou eng Rëtsch vu Ministeren och duerch d'Land gaange sinn, fir verschidde Pro-jete virstellen. Dat ass alles dat, wat mer nen-nen „méi Demokratie, méi Transparenz“, an duerfir steet och dës Regierung.

Ech soen lech Merci.

► Plusieurs voix.- Très bien!

► **M. Mars Di Bartolomeo**, *Président*.- Merci och dem Här Statsminister.

Domat si mer um Enn vun eisen Diskussiounen ukomm. An ech géif proposéieren, dass mer elo iwwert d'Proposition de loi ofstëmmen.

Vote sur l'ensemble de la proposition de loi 6738 et dispense du second vote constitutionnel

Déi, déi dermat d'accord sinn, stëmme mat Jo, an déi...

► **M. Eugène Berger** (DP).- Dräimol Jo, Här President!

(Hilarité)

► **M. Mars Di Bartolomeo**, *Président*.- Bréngt mech elo net duerjerneen! An déi, déi net dermat d'accord sinn, stëmme mat Neen.

D'Ofstëmmung huet ugefaangen. Vote par procuration. An d'Ofstëmmung ass elo eriwwer.

Et hunn 58 Deputéierten direkt oder indirekt drun deelgeholl. Et waren der awer 59 präsent. 34-mol Jo, 24-mol Neen. Also ass d'Proposition de loi ugeholl.

Résultat définitif après redressement: la proposition de loi 6738 est adoptée par 34 voix pour et 26 voix contre.

Ont voté oui: MM. Marc Angel, Frank Arndt, Alex Bodry, Mmes Taina Bofferdin, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen (par M. Alex Bodry), Mme Cécile Hemmen et M. Roger Negri;

MM. Guy Arendt, André Bauler, Gilles Baum, Mme Simone Beissel, M. Eugène Berger, Mme Anne Bras-seur (par M. Eugène Berger), M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Edy Mertens et Mme Lydie Polfer;

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Ro-berto Traversini;

MM. Justin Turpel et Serge Urbany.

Ont voté non: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Ei-schen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch (par Mme Nancy Arendt), MM. Aly Kaes, Marc Lies, Mme Martine Mergen (par Mme Octavie Modert), M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz (par M. Claude Wise-ler), Serge Wilmes (par M. Gilles Roth), Claude Wi-seler, Michel Wolter (par M. Jean-Marie Halsdorf) et Laurent Zeimet;

MM. Gast Gibéryen, Fernand Kartheiser et Roy Re-ding.

Gëtt d'Chamber d'Dispens vum zweete Vote?

(Assentiment)

Merci. Dann ass dat esou décidéiert.

Mir kommen dann zum nächste Punkt vum Ordre du jour, dat ass de Projet de loi 6600, an et geet dobäi ëm de Vëlospisteréseu. D'Rie-dezäit ass nom Modell 1 festgeluecht an d'Rap-portrice, d'Madame Josée Lorsché, huet direkt d'Wuert.

15. 6600 - Projet de loi relatif au ré-seau cyclable national et aux raccor-dements de ce réseau vers les ré-seaux cyclables communaux

Rapport de la Commission du Développe-ment durable

► **Mme Josée Lorsché** (déi gréng), *rappor-trice*.- Merci, Här President. Ech si sécher, e Re-ferendum iwwer besser Vëlospiste géife mer direkt gewannen. D'Fro gétt awer net gestallt.

Dir Dammen an Dir Hären, wéi Der wësst,...

(Interruption)

...soll den net motoriséierte Verkéier bis zum Joer 2020 e Véierel vun alle Bewegungen am Land ausmaachen. Dat ass op alle Fall d'Zil, wat mir eis virun e puer Joer am Kader vun Mobilitéitskonzept MoDu gesat hunn.

Wa mer dëst Zil wierklech wëllen erreechen, musse mer Gas ginn, net am Auto, mä an der Aarbecht. Mir sinn nach wäit dovun ewech.

Nodeems viru 16 Joer en éischt Vëlospistege-setz a Kraaft getrueden ass, geet et haut net duer, un deem Gesetz erëmzepléischteren. Aus deem Grond huet de fréieren Nohaltegkeets-minister Claude Wiseler mat dësem Projet de loi méi e couragéierte Wee ageschloen, mam iwwergräifenden Zil, e Paradigmewissel an der Mobilitéitspolitik anzelauden. Dat heescht, d'Roll vum Vëlo opzewäerten an eben de Vëlo net méi prioritär an de Beräicher Fräizäit, Tou-rismus oder Sport unzesiedelen. Mat dësem Gesetzesprojet gétt de Vëlo als gläichberech-tegt Verkéiersmëttel unerkannt a soll am deeg-leche Berufsstrafic zum Asaz kommen, grad wéi fir vill aner alldeeglech Bewegungen.

Léif Kolleeginnen a Kolleegen, wann ee weess, datt 40% vun den Trajeten, déi an eise Land zrëckgeluecht ginn, manner wéi dräi Kilometer hunn, an datt 13% vun deenen Trajeten nëm-men um Vëlo oder ze Fouss stattfannen, da kënnt een natierlech zur Konkusioun, datt am Vëlostrafic nach e grouss Potenzial stécht. Na-tierlech muss et mobiliséiert ginn. Duerfir musse mer d'Konditiounen erfëllen.

Dat bedeit éischtens, datt souwuel d'Sé-cherheet wéi och d'Offer an awer och d'Quali-téit vun de Vëlosweeër verbessert musse ginn.